

Kolinita Tovetumagana Yadi Leta Anavelu Paulo Givetokilumina

Kivemala

Paulo yana balawalilivuga anaveto wagaine ginau Efeso gimiyamiya ada meKolinita yadi leta nagona givetokilumina. Badi yadi ekalesiya wagaine vita tufodi iyegemona, ada kaliva tufodi wa yadi nuwalaka taudiyavo ikaikaiyedi. Ada yadi leta-nai bademowa inuwagana aku aimo wa yadi nuwalaka taudiyavo ikaikaiyedi. Taidei faine Paulo gina gimadubodadi ada kadu giyewa Efeso. Ada yana maduboda-nai wagaine Paulo ada meKolinita taudiyavo ivenuwanuwakoyo.

E ada aimo kadu leta seyana givetokilumi giimili ginau ada givona toyogina wagaidiya gina kivetuvetunudi faine. Taine leta-nai anavelu meKolinita wagaidiya ani bademowa tova tuwaina wagaine gibwavi, aku Paulo leta-nai giinanana 2:3, 4, 9, ada 7:8-12 wagaine. Ada aimo Paulo gikaiyanogala vaita tovetumagana moyaidi Kolinita wagaine ivemwamwala Paulo faine, aku tufodi ani iawalavena. Kaduwe tovewalamomo tufodi ielai Kolinita ada ivonavona vaita Paulo banae keke afositolo aku badiyavo ani afositolo velemono. E ada Paulo leta taidei giimilina Kolinita. Tauna yana dewa ke yana faisewa faidiya giifufu ada kaduwe yana nuwakabubu meKolinita faidiya. Ada givona vaita muliya-yo

ginana gina madubodadi, nagona ida nuwawiladi yadi dewa koyodi wagaidiya.

Paulo gikivemala yana dewa ke yana veafositolo anavegugai faidiya. (1:1 – 7:16)

Luvekeli tovetumagana Yelusalema wagaine faidiya. (8:1 – 9:15)

Paulo yana veafositolo anaveimeya giawabababalina. (10:1 - 12:10)

Paulo ginuwanuwa toyogina tovetumaganayavo faidiya. (12:11-21)

Paulo giluwageyedi yadi dewa ina vuvugidi ke ina itavenuwadadanedi. (13:1-10)

Lauwage tulina tulina ke vetalakafoi. (13:11-14)

¹ Iya Paulo. Yaubada yana nuwanuwa wagaine gidouweku ke giseku ada gaveafositolo Yeisu Keliso faine. Iyayeku ada tubuiyada Timoti nodi yama vesiule wagaimiya. Imi Yaubada yana yoo tabutabumiyavo Kolinita yana ekalesiya wagaine ada kaduwe Akaiya anafafali matatabuna wagaine, ani leta taidei moyaimi nodi faimiya.

² Yaubada Tamada ke yada Kauveya Yeisu Keliso yadi nuwadogeya ina lemelememi, ada kaduwe aseasemi ina kikiveniwalovidi.

Yaubada yana yoo ani wa adiuloulolo faina, nuwanuwana nuwadi gina kiveiwakanedi.

³ Keke tamo gavana aku Yaubada kana davadavana, Banae ani yada Kauveya Yeisu Keliso Tamana. Banae nuwakalikali vuvuna ada tova moyaina nuwada gikiveiwakanedi.

⁴ Banae Yaubada giitaitada adauloulolo moyaina wagaidiya ada nuwada gikiveiwakanedi,

e ada ide adafaiweya nuwada iwakana-nai wagaine badi gavega vita tulina tulina inuwanuwagadi, ani kana lemedi ke nuwadi kana kiveiwakanedi.

⁵ Faina Keliso uloulolo lakaina ginuwagana, e ada ide anauloulolo-nai kanuwanuwagana. Aku kaduwe anafaiweya Yaubada Keliso nuwana gikiveiwakanena, ada ide Keliso nodi kaveseyana ani Yaubada nuwada gikiveiwakanedi.

⁶ Ada gavatoveya ime uloulolo ana lutovonidi, alamana avaivaina gavaiyamu nuwami ana kiveiwakanedi tova-nai uloulolo-dina imi wana lutovonidi. E ada wana vevekaliva, kaliva-dina Yaubada yana nuwanuwa anafaiweya. Ada gavatoveya Yaubada ime gina kivetoyogima amauloulolo wagaidiya, e ani imi kaduwe gikivetoyogimi, e ada wana mididi toyogina ke vita wana waina ime anafaiweya.

⁷ Ime auloulolo anafaiweya, kadu imiyavo wauloulolo. Ada kaduwe ime Yaubada nuwama gikiveiwakanedi anafaiweya, imi kadu nuwami gina kiveiwakanedi. Taidei faina anuwaveyalaina wa yami atuefaila yami vetumagana gina naunau.

⁸ Tubuiyameyavo, nuwanuwama wana alamanena vita gavatubuga auloloyedi Eisiya anafafali wagaine.[†] Vita-dina ani lakai-moedi ke vita-moedi, ayo ime taumeyavo yama toyogina anafaiweya. E ada veleomoena anuwanuwa vaita kabisona yawaima ana nusegena.

⁹ Ime alutovonina veleomoena ani anafaiweya

[†] 1:8 Gug 19:23, 1Kol 15:30-32

kaliva gilutovonina tova-nai banae ginogalina tovevonayavuga givona, “Iya gavona una alika.” E aku Yaubada giawaegema ana nuwanuwa vaita ana alika, faina keke nuwanuwana ana tunutunuvala taumeyavo yama toyogina wagaine, aku Bana Tauna wagaine ana tunutunuvala, Banae toalika gisisiveyawadi.

¹⁰⁻¹¹ Ada auwe ime ebagilagi koyo-moena lili-vane amiyamiya ada kabiso-moena ada alika, aku Yaubada gikibababalema. Ada tova ke tova aimo gina kibababalema.† Faina Banae wagaine anuwavetumagana e ani aimo kai imi moyaimi wana lemelemema yami veove-ola wagaidiya, aga kaduwe yana kibababala gina naunauwena ime faimeya. E ada kaliva moyaidi ina itana ada ina vesiule-mowa Yaubada wagaine faimeya. Faina taine yadi veola-nai wagaine ada Banae yana nuwadogeya gina lemema.

Paulo meKolinita gimatawedi gavana yana vuvu-yo keke gidana gida madubodadi.

¹² Aku ime agakaikai seyana gaitoma faine ani taide anafaiweya. Ime nuwafoumeya alutovonina vaita yama dewa adewadewayena babi taidei wagaine, ani keke kaliva-mowa yadi nuwauya anafaiweya adadewa, keke. Aku Yaubada yana nuwadoga wagaine aluveybina ada yana nuwanuwa amulumuliyena. E ada keke ada vefwayafwaya aku wa yama nuwanuwa yegayegana nodi aifuifufuyena vona velemoena.† Aku imi matamiya ani velemoena anafaiweya.

† **1:10-11** 2Tim 4:18 † **1:12** 2Kol 2:17

13-14 Waitana, yama leta moyaina wagaidiya ime keke adialamana sewasewavuyena ada vetokilumi, aku tova moyaina avetokilumidi mamalina e ada wana alamane matatabuyena. Tova taidei ani yama dewa vuvuna keke wada alamane-dewedewe, aku anuwavetumagana aimo moyaimi wana alamane-yabuna. E ada tova-nai Kauveya Yeisu yana yewa wagaine, ime ana gakaikai imi faimiya anafaiweya, kadu imi wana gakaikai ime faimeya.

15-16 E ada wa yaku nuwaveyalaina anafaiweya, gaveimeya vaita nagona gana madubodami yakuna Masedoniya anafafali wagaine, e ada yaku yewa-vagila wagaine kaduwe gada yewaelai wagaimiya. Taidei wagaine Iya akufata gada lememe maita-moena ada yakuna Yudiya anafafali faine gavana tamo akulema nodi wada imiliku.

17 Taidei anafaiweya ganuwanuwa evona gana gugai faina, gavona, "Iya nagona ganau meKolinita wagaidiya," aku keke gadaela. E ada gavaiyamu wanuwanuwa? Vaita gada veyatayata? Badi gavega taudiyavo gaga faidiya inuwanuwa ani yadi veimeya faidiya kai inavona, "Ika, velemoena gana faisewana," aku velemoena inuwanuwa, ani "Keke, Iya keke gana faisewa." Aku Iyayeku ani keke anafaiweya gada dewadewa.

18 Ida velemoena, Yaubada keke gida nuwanuwa iluwei aku tova moyaina gavana ginavona aga gina gugaiyena. Ada anafaiweya, Iya keke-mowa gadavona, "Ika, Iya tainei gana faisewana," aku gada nuwanuwa, "Keke."

19 Faina Yaubada Natuna Yeisu Keliso keke-mowa gidavona, “Ika” aku nuwane gida nuwanuwa, “Keke”, aku yana nuwanuwa yana vona nodi seyana “Ika”. Banae-nai amimwatuguya alumamalena, Iyayeku ada Sailasi ke Timoti nodi.†

20 Ime aalamanena vaita ida vona velemoena, faina Yaubada yana vonadabadaba matatabudi adiwavelemoena iyegemona velemoena Yeisu Keliso wagaine. Taidei vuvuna Yaubada kadavadavana kavonavona, “Ika, anafaiweya!” ada Banae wa yana iwakana mamalina kakilakaina.

21 Ada Banae Yaubada-nai ani imiyavo ke imeyavo gikidonedada yada veseyana Keliso nodi, ada givenuwadadaneda yana faisewa kana gugaiyena ke gitoyogiveleda faisewa-nai faine.

22 Ada Tauna Banae yana talakili gisena ide wagaideya ke gina vewala vaita ideyavo ani Tauna yana kaliva velemoena. Taidei talakili-nai ani Aluwaluwana giveleda, Bana yana nuwakabubu nago-moena wagaideya, yana vonadabadaba anaiyaiyaya, vaita gava nuwakabubu moyaidi givonadabadabayedi ani badi aimo kaduwe gina veleda.†

23 E aku Yaubada Tauna ani akutoitavedama vaita gavonavona velemoena wagaimiya ada keke gada vefwayafwaya. Yaku yewa wagaine ganuwanuwa yami dewa koyona faidiya e ada keke nuwanuwaku yaku kivetuvetunu wagaine kadu uloulolo gana velemini, ada taidei vuvuna-nai faine keke gadayewa gada madubodami Kolinita

† 1:19 Gug 18:5 † 1:22 Efes 1:13-14

wagaine.

²⁴ Keke vaita ime amitoveimeyayavo ke ana veimeya-tagotagomi anavona, “Taidei anafaiweya wana vetumagana.” Keke. Iya gaalamanena yami vetumagana wagaine bademowa wamidimididi toyogina. Aku imeyavo imi nodi kafaifaisewa seyana yami vemwamwala faine.

2

¹ Tova-nai gamadubodami ani yami dewa faidiya gavona wagaimiya, ada ida vitana wagaimiya. E ada taidei tauku gavenuwadadanena, vaita Iya keke kaduwe wa yaku nuwavita gana madubodami ada aseasemi gana kiveuloulolodi.

² Imiyavo-mina ani wakivemwamwaliku. E ada kai Iya tauku gana kivenuwavitami yaku kivetunu wagaidiya, aga gavega imiyamiya ayo ina kivemwamwaliku?

³ E ada Iya keke gadaela gada madubodami, aku tainei tova-nai wagaine leta gaimilina wagaimiya. Iya gavetokilumina ke wana alamanena gavana wadagai yami dewa tufodi faidiya, e ada tova-nai ganaela gana madubodami, keke wana kivenuwavitaku aku yami dewa bademowa wakivetununa faina, gana vemwamwala. Ganuwaveyalaina vaita matatabumi yaku kivetunu wana muliyena, e ada yaku vemwamwala wagaine imi kaduwe wana vemwamwala.

⁴ Tova-nai yami leta gavetokilumina, wa yaku nuwavita ada wa yaku aseuloulolo lakaina

gamiyamiya e ada wa matailuku gavetokiluma. Yaku vetokiluma vuvuna ani keke vaita gana kivenuwavitami, keke, aku aiyada ani yaku nuwakabubu anatubuga wagaimiya wana alamanena.†

Tokoyona ginuwavilana, e ada gilubodana yana koyona ina venuwaegena.

⁵ Aku bana kaliva-nai moyaida gikivenuwavita-tada ani kada nuwanuwayena. Banae yana dewa koyona wagaine aseuloulolo gikiveyegemonina,† ada banae imi yami yoo anakaliva faina, anaita imi kadu matatabumi gikiveaseuloulolonimi, keke Iyayeku gagana. Aku keke nuwanuwaku ganavona toyogi-vagina wagaimiya.

⁶ Tufona moyaimi waawaegau analauboda anafaiweya ada anamatavuloga wavelena, aku malinai bademowa yana dewa-nai koyona gisegena. E ada auwe, matavuloga-nai anafata.

⁷ E ada vematavuloga wanasena aku aiyada yana koyona wada venuwaegena ada nuwana wana kiveiwakanena, e ada nuwavita keke bana gina toyogisege.

⁸ Tayuwe vuvu-dina faidiya gavonava-gadonemi ke yami nuwakabubu velemonoena kaduwe wana seyegemonena banae wagaine.

⁹ Yami leta ani bana anakivetunu faina gavetokilumina e ada gana galuvaluvami. Nuwanuwaku gana itana kai bonaku wana nogalina gaitoma moyaina wagaine o kai keke. Ada imi wagugai tunutunugina.

¹⁰ Kai gaito seyana yana koyona wavenuwaegena, Iya kaduwe tauku

† 2:4 2Kol 7:8-9 † 2:5 1Kol 5:1

gavenuwaegena. Gavadewa koyona analauboda kada venuwaegena, ani bademowa gavenuwaegena. Iya gadewa anafaiweya Keliso matane imi amilema faina.

¹¹ Seitani nuwanuwana tova moyaina koyona gina kiveyegemonidi, ani kaalamanena. Ada taidei faina gilubodana tokoyona bademowa yadi dewa koyona ivedomobubusedi, ani yadi koyona kana venuwaegedi. Taidei yada venuwaeged wagaine, Seitani** keke wayana nuwauya gina vetowainagona wagaideya ke yada miya-tamwai gina kivekoyo.

Keliso wagaine ime avewainagona.

¹² E aku nagona yaku naudadana wagaine, ganau melala lakaina Tolowasi gana lumamala valeya iwakana Yeisu Keliso faine, ada ganuwagana vaita Kauveya Yeisu wana giyavuna faikuya yana gugai faine, ada kaliva moyaidi bonaku inogalina.

¹³ Taidei anafaiweya gaitanuwigana, aku tubuiyada Taito aimo keke gidaela ada gavenuwana bana faine. E ada tovetumagana gavetalakafoiyedi aku gana gayegemona Masedoniya anafafali wagaine.**

** **2:11** Seitani ani dimoniyavo aditonagona. Nagona banae gimiyamiya iwakana gabameya Yaubada ada anelose nodi, aku aimo Yaubada yana veimeya adimuliya gidibusoyogedi e ada Yaubada giveyegemonina gabameya. Ada malinai tova moyaina kaliva babiya gialadibidibiyedi ke gikikivekoyodi. Banae anayegana ani kaduwe Biyelisibubi, toveloi-kavokavovo, tovenibaina, ada toetoluvaluva.

** **2:13** Una itana 7:5-6, wadedeku Taito yana ela Paulo giifufuyena.

14 E aku kana vesiule Yaubada wagaine.**
 Tuwaina tova-nai Loma tonagona givetoyogina gaviya lakaina wagaine, ani yana tolugaviya ada gavega ivaidei yogoyogodi ani gina nagoyedi yana yoo matadiya ke yana vetoyogina gina vewalena. Ada taidei anafaiweya ime amiyaluveyabina Keliso wagaine. Yaubada ginagonagoyema, ke tova moyaina Banae yana toyogina wagaine Seitani atoyogisegenana. Ada kaduwe Yaubada giseyegemonena Keliso anaalamana ime wagaimeya fafali seyana seyana wagaidiya, alamana-nai anafaiweya magamaga iwakana.

15 Yeisu Keliso yana vebolavoi kelose wagaine, ani Yaubada matane vaita magamaga iwakana anafaiweya, kaduwe Yaubada matane yama gugai Keliso faine ani vaita magamaga iwakana anafaiweya. Taidei magana-nai iwakana giakwalelega badi gavega kibababala anawai wagaine inaunau, ada kaduwe giakwalelega badi gavega alika anawai wagaine inaunau.**

16 Badi alika anawai wagaine inaunau, ani wagaidiya Keliso anamagamaga vaita didikula analada magana anafaiweya. Aku badi kibababala anawaiya inaunau, ani magamaga-nai vaita yawai-vagata anamagamaga. Aku faisewa-nai anavita, ani gaito anafata tauna yana toyogina

** 2:14 Paulo ginuwagana Taito Masedoniya-deya ada yana awatalatalaina iwakana ginogalina meKolinita tovetumagana faidiya, e ada taidei maita-nai wagaine banae Yaubada giawadavadavana. **

2:15 Vona-nai 'alika anawai' ananuwanuwa ani badi gavega keke taudiyavo ida awaegedi Yaubada wagaine e ada keke Yaubada nodi ina miyamiya-vagata aku luludakadi Banae wagaine-deya ina miyami.

wagaina ginawai? Keke tamo gaito.

¹⁷ Kaliva tufodi Yaubada yana vona ilulumamalena ani inuwanuwa ivona, “Ida gaitoma-kavokavovo, aku au ana lulumamalena ke mani lakaina ana nuwagana.” Aku ime keke anafaiweya adadewa. Keliso nodi aveseyana, ada Yaubada Tauna givenuwadadanema yama faisewa faine. E ada Yaubada matane wa yama aseawaega avonavona kaliva wagaidiya.

3

Kolinita tovetumagana ani vaita leta Keliso wagaine anafaiweya.

¹ Gaalamanena seyana gaito ginavona, “Paulo wa tubuiyanavo nodi kaduwe taudiyavo ikiki-lakaidi.” Aku keke. Ime keke kaliva tufodi anafaiweya. Faina badiyavo ani adialamana anafefe iwaiwaina e ada kaliva ina vetumaganedi.[†] Aku imeyavo, ani keke tamo gavavuvu e ada leta anafaiweya wada vetokilumi ime faimeya, o kai ime leta anafaiweya ada vewalemi.

² Imi taumiyavo meKolinita ani vaita yama leta ivetokilumina aseasemeya anafaiweya, e ada kaliva moyaidi ina veyawana ada ina alamanena vaita ime wa amavetumagana.

³ Imiyavo vaita Keliso yana leta anafaiweya, ime yama faisewa guwana giseyegemonena. Ada ida-nai ani mamalina kaliva moyaidi wagaidiya. Leta-nai, Yaubada Tomiya-vagata Aluwaluwana givetokilumina. Aku keke iniki wagaine gida vetokilumi, ada keke gida vetokilumi kabala iluwei beyabeyadi wagaidiya, anafaiweya

[†] 3:1 Gug 18:27

Yaubada Mosese givelena.† Aku givetokilumina kaliva aseasediya.

4 Taidei anafaiweya ime wa yama nuwaveyalata Yaubada matane, e ada yama gugai guwana amimwatuguya faine avetokiluma, faina Keliso gikivetoyogima.

5 Aku keke taumeyavo yama toyogineya ime amafata faisewa taidei ana faisewa e ada anavona, "Taidei Yaubada yana faisewa, ani ime taumeyavo afaisewana." Keke. Aku velemono taidei yama toyogina-nai wagaine amafata, ani Yaubada Banae givelevelema.

6 Banae Tauna gitoyoginavelema ke kaliva alemelemedi nuwadi gina malina Yaubada yana veyavo anawai Banae gifaisewana faideya. Veyavo anawai evaguna taidei, ani vuvuna keke veimeya-dina Yaubada givetokilumidi tova-nai veyavo tuwaina gifaisewana meIsileli nodi, aku aiyada vuvuna ani Aluwaluwa Tabuna yana faisewa. Faina veimeya vetovetokilumidi ani kai kaliva iyaweyawelidi, adimatavuloga inaunau alika anawai wagaine. Aku Aluwaluwa Tabuna ginaunauwedi yawai-vagata anawai wagaine.**

Veyavo anawai evaguna lakai-moena ayo veyavo tuwaina anawai.

7 Imiyavo wana nuwanuwayena. Yaubada yana veimeya tuwaina, bana wagaine kaliva igugai Banae faine, ani tova moyaina alika

† 3:3 Iyeg 24:12 ** 3:6 Veimeya vetovetokilumidi ani dewa giveimeyena wamelaleya kaliva wagaine-deya, aku Yaubada Aluwaluwana givonavona negenine nuwainagene-deya, e ada gilemelemeda ke kana fasima Yeisu bonana kana abina. (Iyo 6:63, Lom 7:6)

gikikiveyegemonina. Aku tainei veimeya-nai, tova-nai Yaubada givetokilumina kabala wagaidiya ada meIsileli giveledi, yana iwakana mamalina giyegemona ke Mosese magigina gimalivuyona. Ada yana malina toyogina meIsileli matadi gionana e ada keke adifaiweya Mosese magigina ina itadonedone.[†] Aku malina-nai gimiya tova kabisona gagana wagaine, ada giavaina.

⁸ Aku Yaubada yana wai evaguna bana wagaine ide Yaubada faina kafaifaisewa, tainei Aluwaluwa Tabuna anawai. E ada wai-nai ani wa yana iwakana mamalina lakaina, e ada gitoyogisegena wai tuwaina.

⁹ Kaduwe ganavona-vagila. Veyavo anawai tuwaina anaveimeya giawatalatalaina vaita ide tokoyona e ada adalauboda matavuloga kana nuwagana, aku taine veyavo anawai-nai ani wa yana iwakana mamalina. E aku veyavo anawai evaguna anaveimeya, vuvuna Aluwaluwa Tabuna Banae gikiveyegayeganeda Yaubada matane, ani yana iwakana mamalina lakai-vagina.

¹⁰ Veimeya-nai tuwaina ani wa yana iwakana mamalina, aku tova-nai wai evaguna giyegemona, aga yana iwakana mamalina veimeya-nai tuwaina gitubusegena, ada nodi iveluveyedi wagaine ani vaita veimeya tuwaina yana iwakana mamalina giavaina.

¹¹ Faina kai veyavo anawai tuwaina giavavaina ani wa yana iwakana mamalina, aga veyavo anawai evaguna keke wa anaebalauyabu, ani

[†] 3:7 Iyeg 34:30

yana iwakana mamalina gavatubuga!

¹² Aalamanena Yaubada yana veyavo anawai evaguna ani wa yana iwakana mamalina, e ada yama laumamala wagaidiya keke ada vovomumu aku au wa yama asevatu avonavona kaliva wagaidiya.

¹³ Ime keke anafaiweya Mosese, banae magigi anaseboda kaleko magigine gisesena, e ada meIsileli keke adifata inaita kaikaiwabu malina giawawana.

¹⁴ Aku au badi meIsileli yadi nuwanuwa itufa. Ada tova tuwaina ke gielai malinai, tova-nai Yaubada yana veyavo anawai tuwaina ina veyawana, aga keke mamalina wagaidiya, e ani anafaiweya vaita kaleko-nai yadi nuwanuwa gida kiwafi. Ada kaduwe aimo malinai gimiyamiya anafaiweya, badi aimo nuwadi itufa e ada Yaubada bonana keke gidamali wagaidiya. Ida-nai ani faina Keliso gaga Bana anafata kaleko gina vaiyavulena wagaidiya-deya. Kai Keliso wagaine taudiyavo ina awaegedi ke Banae nodi ina veseyana, aga gina kivealamanidi ina alamana, ada vaita magigi anakiwafi gida avovoli anafaiweya.

¹⁵ Ida keke tuwaina gaga anafaiweya aku malinai kaduwe. Gavatoveya meIsileli ina veyawana Veyavo Anawai Tuwaina anabuki Mosese give-tokilumina, aga ina vaita magigi anakiwafi yadi nuwanuwa gikiwafidi anafaiweya.

¹⁶ Aku au gavatoveya gaito seyana gina miyavilana Kauveya Yeisu wagaine, e au Yaubada magigi anakiwafi-nai gina vaiyavulena

wagaine-deya.[†]

¹⁷ Kauveya ani Banae Aluwaluwa Tabuna. Ada gadedeku-deya Kauveya Aluwaluwana gimiyamiya, aga keke tamo gavana kadu kaliva gina seboda Yaubada wagaine-deya. E ada kai gaito nuwainagene Kauveya Aluwaluwana gimiyamiya, banae ani keke aimo gina miyami yogoyogona, aku etoetoyavuna.[†]

¹⁸ E ada ide tovetumagana moyaida ani Keliso yada nuwanuwa gikikivemalidi, anafaiweya vaita magigi anakiwafi givai gisegenana magigida wagaidiya-deya. Ada Kauveya anununa yana iwakana mamalina kanuwanuwayena aku Banae gisevedavedamada e ada kana veanafaiweya Banae. Ada yada alamana Banae faine gitubutubuga e ada anunuda yana iwakana mamalina kadu giveiveinala, e ada adaitaita anafaiweya Banae anununa. Taidei gugai-nai ani Kauveya gigugugaiyena wagaideya, Banae Aluwaluwa Tabuna.

4

Keliso yana valeya iwakana ani malina gisena wagaimeya.

¹ E ada Yaubada amafaisewa givelema ke Yeisu valeyana aawaawamogatalena. Ada Banae yana nuwakalikali anuwanuwagana faina, au vita tulina tulina wagaimeya iyegeyegemona nonogana aseasema keke gida aliuliu.

² Ime aseasema keke gida aliuliu, aku aiyada kaliva yadi dewa-dina moyaina

[†] 3:16 Lom 11:23 [†] 3:17 Iyo 8:32,36, Lom 8:2, Gal 5:1

wa yadi vovomumu igugai ikavuya-deya, ani bademowa avedomobubuse-moedi. Keke tamo tova ada galuvaluva ke yama nuwaueya kaliva ada fwayafwayadi.[†] Ada kaduwe keke Yaubada yana vona ada vevewala aku kaduwe ada tubotubo nuwanuwa balana wagaine. E aku aiyada aalamanena Yaubada giitaitama, e ada yana nuwanuwa velemonoena aseseyegemonena kaliva wagaidiya. Taidei wagaine nuwafoudiya ina lutovonina vaita imeyavo wa amavetumagana.

³ Aku kai velemonoena valeya iwakana ime alulumamalena ani keke mamalina ke vaita sewase-wavuyena kaliva wagaidiya, aga gavega keke gidamali wagaidiya? Ani badiyavo alika-vagata anawai wagaine inaunau, taine kaliva-dina keke mamalina wagaidiya.

⁴ Badiyavo ani yadi nuwanuwa Seitani giki-bodana, banae babi taidei anayaubada. E ada Keliso anavaleya iwakana anamalina wagaidiya gituituimala aku keke adifaiweya nuwadi ginamali.[†] Valeya taidei gikikiveyegemonina Keliso yana iwakana mamalina, Banae yana veuluva ani Yaubada yana veuluva anafaiweya.

⁵ E ada waitana, keke taumeyavo amayegana ada kilakai yama laumamala wagaine, aku velemonoena ani yama nuwanuwa asena Yeisu wagaine ada avonavona, “Yeisu Keliso Banae Kauveya, ada ime taumeyavo ani yami togugaiyavo Banae faine.”

⁶ Faina Yaubada-nai tuwai-moena givona, “Malina gina tuimala yuyuvana wagaine-deya,”[†] ani Banae yana malina lunamanamalina giimilina

[†] 4:2 1Tes 2:5 [†] 4:4 Efes 2:2 [†] 4:6 Eba 1:3

ke aseasema gituimalidi. E ada Yaubada yana iwakana mamalina Keliso magigina wagaine ana itana, ke Yaubada Tauna ana alamanena ada ana miyamiya yana malina wagaine.[†]

Yaubada yana kaliva ani vaita wela-mowa anafaiweya.

⁷ Aku Yaubada yana malina lunamanamalina Yeisu Keliso gikiveyegemonina ani vaita lokoloko kaikaiwabu wagaimeya. Ime kaliva-mowa au anafaiweya wela kavokavovo ibubudi babi wagaine nonogana wagaimeya yana kaikaiwabu taidei gisena. Taine wagaine ime akiveyegemonina toyogina-nai lakai-moena wagaimeya, ani vu-vutoletolena keke wagaimeya-deya aku Yaubada wagaine-deya.

⁸ Ebaita tufodi gana inanadi. Vita moyaina wai tulina tulina ivetutu toyogina wagaimeya, aku keke ida vetutuyawaliyema. Ime kivekabekabebe moyaina anuwanuwagadi faina, tamo tova ikivenuwavoganima aku keke ida kivenuwavogani-yabuma.

⁹ Amagaviyayavo ikiveuloulolonima, aku Yaubada keke gida segesegema. Tamo tova imunumunu dewedewe-moema, aku keke ida luvealikama.

¹⁰ Nagona Yeisu ikiveuloulolonina, ada aimoyo iluvealikana. Ada kaduwe anafaiweya, ime Yeisu anavaleya iwakana aawaawamogatalena e ada uloulolo anuwanuwagadi, ada nuwanuwadi ina luvealikama. Aku ime aawaegema uloulolo taidei wagaine ke amidimididi toyogina, e ada

[†] 4:6 1Pi 2:9

Yeisu yawaina ana seyegemonena vovoma wagaidiya.

¹¹ Imeyavo ani kaliva-mowa babiya amiyamiya, ada yama toyogina keke lakaina. Aku yama tova babi wagaine amiyamiya ani taumeyavo aawaegema Yeisu wagaine faina, tova moyaina meyameyaganina alika ana nuwagana.[†] Aku au amidimididi toyogina ada vita-dina awaiwaidi aku kaliva moyaidi iitaitana ayo ina alamanena Yeisu wayawaina vovomeya gimiya.

¹² Anaalamana ani taidei anafaiweya. Ime tova moyaina alika yana toyogina alulutovonina yama gugai faina, aku gugai-nai guwana ani imiyavo yawai velemona evaguna walulutovonina.

¹³ Aku keke ada kabekabebe. Yama nuwanuwa ani anafaiweya kaliva-nai givetokiluma, givona, “Iya gavetumagana ada taidei faina gavona.” [†] Ada imeyavo kaduwe Yaubada avetumaganena anafaiweya, ada taidei faina valeya iwakana aawaawamogatalena.

¹⁴ Faina ime aalamanena kai ina munuma, aga Banae-menai yada Kauveya Yeisu gisiveyawana alika wagaine ani ime kadu Yeisu nodi gina siveyawama.[†] Ada aimo imeyavo kadu imiyavo ani nodi gina voga Tauna matane.

¹⁵ Taide vita-dina moyaidi anuwanuwagadi ani imi amilema faina. Ada taidei anafaiweya Yaubada wa yana nuwadoga kaliva moyaidi gina lemelemedi, e ada moyaidi ina vesivesiule Yaubada wagaine ke anayegana anakilakata

[†] **4:11** Lom 8:36 [†] **4:13** Sam 116:10 [†] **4:14** Lom 8:11, 1Tes 4:14

gina veiveinala-mowa.

Gaitoma-dina iwakadi ime ana nuwagadi ani lakai-moena ayo uloulolo babi taidei wagaine.

¹⁶ Taidei faina, keke ada kabekabebe e ada valey a iwakana anavewala ada ilova, keke. Auwe kai vovoma yadi toyogina giavaavaina ke mainuwadi mainuwadi ialialika, aku yadayada seyana seyana Yaubada nuwainagenima gikikive evaguna.

¹⁷ Ee, ime keke ada kabekabebe. Faina taidei uloulolo-dina kabisodi malinai anuwanuwagadi, ani keke ina miyami tova manamanawena, aku aimo guwa ina seyegemonena wagaimeya e ada ina kidewedewema ke Yaubada nodi anamiya-vagata, Banae wa yana iwakana mamalina lakai-moena kadu miyamiyani-vagaina. Taidei yama miya-nai aimo ana miyamiyanena, ani taide amavita-dina gina veiwakasegedi.†

¹⁸ Taidei anafaiweya amaulolo-dina anuwenuwedi, faina keke yama nuwanuwa adasei gaitoma-dina amafata ana itadi wagaidiya, aku gaitoma-dina keke amafata ana itadi ani tainei gaitoma-dina wagaidiya yama nuwanuwa asevelavelalaina. Faina gaitoma-dina aitaitadi ani keke tova manamanawena ida miyami, aku gaitoma-dina keke amafata anaita ani badi miyamiyani-vagaidi.†

5

Kana nuwaveyalaina Yaubada gina siveyawa-vagileda.

† 4:17 Lom 8:18 † 4:18 Ibel 11:1-3

¹ Idedeku babiya vovoda wagaidiya kamiya miya ani tova maufona gaga, e ada vovoda ani vaita vada anafaiweya. Ada kaalamanena kai taidei vada-nai wagaine kamiya miya ina luvealikana, aga vovoda miyamiyani-vagaina bademowa Yaubada gikidewedewedi gabameya, ani wagaidiya kana miyamiya. Anaibubuna keke kaliva wagaidiya, aku Yaubada Tauna nimana wagaine.

² E aku tova malinai babi taidei wagaine vovoda-dina wagaidiya kamiya miya, aku kalogilogita nuwanuwada lakaina vovoda gabameya-deya kana osena, e ada kaluluyawaiyena.†

³ Taidei anafaiweya kanuwanuwa, faina tova-nai Yaubada gina vekalekoda vovoda evagudi wagaidiya, keke vaita aluwaluwadaga, ina vaita konekonedu, aku wa vovoda nodi.

⁴ Tova-dina kamiya miya vovo taidei wagaine ina vada anafaiweya, kalutovonina anafaiweya vita lakaina kawaiwaina, ada kaluluyawai. Taidei anafaiweya kaluluyawai ani keke vaita nuwanuwada kana alika ke babi anavovo kana veyalili faina, aku nuwanuwada gabama anavovo kana osena. E ada vovoda ina alika ani au ina sevedavedama ina vevovo miyamiyani-vagaidi,† anafaiweya vaita yawai-vagata gina tonoyabuna gavana gialialika.

⁵ Banae bademowa gikidewedeweda yada miya evaguna faine, ani Yaubada. Ada kaduwe giveda Aluwaluwa Tabuna.† Aluwaluwa Tabuna-nai ani yada laufata Yaubada nagona

† 5:2 Lom 8:23 † 5:4 1Kol 15:53 † 5:5 Lom 8:16

gimaduveleda, ada taidei yada iyaiyaya e ada kana alamanena velemono vaita gaitoma moyaidi aimo gina veleda ani kana nuwagadi.

⁶ Taidei faina tova moyaina ime aseaseva-tumeyavo. Faina aalamanena vovoma ani badi ebamiya gagana yama miyami babiyanatoveya. Ada kai aimo babi anavovo-dina amiyamiyanedi, aga aimo keke ada miyami Kauveya nodi gabameya.

⁷ Waitana, amiyamiya ani keke gavana matameya aitaiana wagaine, aku aiyada Yaubada anavetumagana wagaine amiyamiya.[†]

⁸ E, ime aseasevatuma, ada keke alika ada matause. Kai babi anavovo ana segena ada anana Kauveya Yeisu nodi ana vemanuwa gabameya, aga ida iwaka-moena wagaimewa.[†]

⁹ Taidei faina, kai babi anavovo wagaine ana vemanuwa, o kai ana segedi ke Kauveya nodi ana miyamiya, yama nunu lakaina ani Yaubada ana kivermwamwalina.

¹⁰ Faina aimo tova-nai Keliso gina vetoga vevonayavuga anaivi wagaine ke tovetumagana gina vevonayavugida, gilubodana matatabu-moeda kana mididi Banae matane.[†] Banae gina vevonayavugida e ada tova-nai ide aimo kamiyamiya babi anavovo wagaine, kai dewa koyodi kafaisewadi aga matavuloga kana nuwagana, aku kai dewa iwakana kagugaiyedi aga laufata iwakana kana nuwagana.

Keliso yana alika wagaine adafaiweya kana vetubuiyana Yaubada nodi.

[†] 5:7 Ibel 11:13-14 [†] 5:8 Fip 1:23 [†] 5:10 Mad 25:31-32, Gug 10:42, Lom 2:16, 14:10

11 Ada Keliso yada dewa gina fatana faina, wa yama vemoimoina Yaubada amatamatausena,[†] e ada agaluvaluva kaliva nuwadi ana kanina ke taudiyavo ina awaegedi Banae wagaine. Gavaiyamu yama nuwanuwa ada yama dewa anafaiweya, Yaubada bademowa gialamanena, ada ganuwaveyalaina nuwafoumiya kaduwe waalamanena.

12 Keke vaita kaduwe ada galuvaluva taumeyavo amayegana ana kilakai ayo wana awaveiwakanema, keke. Aku aiyada ime akivenuwaududumi yama dewa faina, e ada imi amifata faimeya wana gakaikai. Tovewala tufodi igakaikai taudiyavo faidiya ada gavana ifaifaisewana faina, aku keke ida nuwanuwa gavaiyamu nuwainagediya inuwanuwa faina, kai nuwanuwa-dina yegayegadi Yaubada matane o kai keke. E ada ime akivemeyameyaganina faimiya ke badi nodi wana veifuifufu wagaine, ani amifaiweya ime wana awaveiwakanema.

13 Taumeyavo yama awaega Yaubada wagaine lakaina velemonoena faina, tufodi ivona vaita ime avekwavakwava. Kai tainei anafaiweya, aga nuwanuwama wana alamanena vaita ime anafaiweya adewa ani Yaubada anakivemwamwala faina. Aku kai wanuwanuwa vaita wa yama nuwauya ayavivila, tainei iwakana. Nuwanuwama wana alamanena vaita anafaiweya adewa, ani ana lememe faina.

14 Waitana, Keliso ginuwakabubuyeda lakaina, e ada taide yana nuwakabubu-nai ani ginago-nagoyeda. Faina alamana bademowa avaina ani

[†] 5:11 Ibel 10:30-31

taidei anafaiweya. Kaliva seyana, tainei Keliso, ani gialika kaliva matatabuda faideya, e ada ide matatabuda Banae nodi kaalika.

¹⁵ Ada matatabuda faideya gialika e ada ide gavega kamiyamiya wayawaida, ani keke taudeyavo yada miya anakivemwamwala faina kanamiya, aku Keliso anakivemwamwala faina,[†] Banae-nai faideya gialika ada Yaubada gisiveyawana alikeya.

¹⁶ Tova tuwaina babi ananuwanuwa wagaine kaliva aitavenuwadadanedi adiita wagaidiya, o adiivi, o unumidi, o gavana ifaisewana wagaine, e aku malinai keke aimo taide anafaiweya kaliva ada nuwenuwe. Ada kaduwe tova tuwaina Keliso aitavenuwadadanena anafaiweya Banae kalivamowa, aku malinai keke aimo ada itaita anafaiweya.

¹⁷ E ada kai gaito seyana tauna giawaegena Keliso wagaine ke nodi iveseyana, banae ani ibubuna evaguna. Gaitoma tuwaidi giavaidi. Waitana, gaitoma matatabuna bademowa iveevagu.[†]

¹⁸ Tainei kiveevagu matatabuna giyegeyege-mona ani givevuvu Yaubada wagaine. Tuwaina ide Banae nibainavo ada keke adafata Bana nodi kana vetubuiyana. Aku Yaubada Keliso gimilina ada giobuelai, e ada Keliso wagaine malinai Yaubada ide giveseyana-vagileda Tauna nodi.[†] Ada ime amaveimeya givilema ke ana awatalatalainena kaliva wagaidiya, e ada badiyavo kaduwe Yaubada nodi ana veseyana-vagiledi.

[†] 5:15 Lom 14:7-8 [†] 5:17 Iyo 3:3 [†] 5:18 Lom 5:10

19 Veseyana-vagila taidei ani ananuwanuwa taidei anafaiweya. Yaubada ani Keliso wagainede-ya tomiyababi moyaida giveseyana-vagileda e ada venibaina anatova giavaina, ada ide malinai kaveseyana-vagila Banae nodi.[†] Ada yana veimeya adiiyawela ide tovetumagana kafaisewadi, ani keke gida nuwenuwedi vaita faidiya gina vematavulogida. Au taidei anafaiweya Yaubada kaliva giveseyana-vagileda ada yana veseyana-vagila anaawatalatalaina, ani nimeya gisena ana faisewana ke ana vewalayena kaliva wagaidiya.

20 Tainei faina Keliso faine ime aveagetoga. Tova-nai ime kaliva ana vonedi veyavo anavaleya faina, ani velemoena Yaubada Bana Tauna giveoveoledi toyogina ime wagaimiya-deya. Ada ime Keliso awana, ani yama veola toyogina asena wagaimiya, wana awaegau ke Yaubada nodi wana veseyana-vagila.

21 Keliso ani keke tamo gavakoyona gida lutovoni,[†] aku Yaubada ide yada koyona matatabuna gisedamanena Bana wagaine. Taidei wagaine adavematavuloga yada koyona faidiya ani Keliso giwaina. Banae taidei gifaisewana e ada ide gavega kaawaegeda Banae wagaine, ani wagaideya Yaubada yana yegayegana gina sedamanena.

6

Gavaiyamu Keliso yana togugai idadewa.

[†] 5:19 Kol 1:19-20 [†] 5:21 Ibel 4:15

¹ Imeyavo afaifaisewa Yaubada nodi seyana, e ada alulumodovemi, Yaubada wa yana nuwadoga gilememi e ada yana leme-nai wana vegugaiyena. Keke wanavai-kavovo.

² Faina tuwai-moena Yaubada bademowa givona yana Buki wagaine, givonaga,

“Tova iwakana wagaine Iya gavenogalemi.
E ani kibababala anatoveya Iya galememi.” †

Yaubada taidei anafaiweya givona, e ada yaku vona wagaimiya wana nogalina. Tova-nai iwakana malinai. Malinai ani tova iwakana ke amikibababala wana vaina.

³ Yama dewa matatabuna aitaitaveyabidi ani gina naunau aenanai tamo gaito gina itama ada ginavona, “Anaita Paulo wa tubuiyanavo ani badi Yaubada yana togugaiyavo, aku ikoyokoyona. Taine faina Keliso-nai ivonavonayena ani Iya gadibusoyogena.” Kai anafaiweya kaliva ada kivebeudi yadi vetumagana wagaine, aga kaliva ida itama ke yama faisewa ida awavekoyoyena.

⁴ Aku yama yauvivila matatabuna wagaidiya yama dewa iwakana aseseyegemonena, e ada kaliva ina alamanena vaita ime velemono Yaubada yana gugai anavetogugaiyavo. Vita tulina tulina ada ebaaseuloulolo iyegemona wagaimiya, aku wa yama atuvefaila nodi matatabuna auloloyedi.

⁵ Tamo tova kaliva ilumalimaliwavuma, isema deli wagaine, ada yoo tonuwakoyo

† 6:2 Ais 49:8

ilutuwatuwainema,[†] ada avediwe toyogina yama faisewa-nai Yaubada faine e ani agakabekabebe. Yama faisewa faine tamo tova keke ada dauda, ada wa mafalavugimeyavo amiyamiya.

⁶ Kaduwe taumeyavo aawavelemoenayema yama dewa iwakanaga wagaine, Yaubada alamana givelema yana vona velemoena faine, kaliva aatuvefailedi, ada wa yama nuwadoga alemelemedi. Imeyavo aluveyabina Aluwaluwa Tabuna wagaine ke gina lemelemema. Aseasema iwakana wagaine kaliva anuwakabubuyedi.

⁷ Yaubada yana vona velemoena giive-mogatalina wagaimeya ke aawatalatalainena, ada kaduwe yana toyogina akiveyegemonina. Wana itana, gaviya wagaidiya tolugaviya yadi lokoloko gaviya ikiabidi, aiyatagidiya yadi giyo, aimaulidiya yadi veve. E ada nuwanuwa ke dewa yegayegana ani vaita yama lokoloko gaviya anafaiweya, ada wagaidiya nibaimeyavo yadi nuwanuwa koyona aweuweudi aku kaduwe ime taumeyavo ayavayavama.

⁸ Kaliva tufodi ivemoimoinema, aku tufodi iitaitatagoma. Kaliva tufodi iawaveiwakanema, aku tufodi nuwanuwadi amayegana ina kikivekoyona e ada iveveloima. Ime tovana velemoena nonogana ivewagama tofewayafwaya.

⁹ Kaliva moyaidi ialamanema nonogana tufona idewema anafaiweya vaita ime kaliva-kavokavovo. Tufodi imunumunuma ke inuwanuwa vaita ime aalika, aku waitana, aimo wayawaimeyavo amiyamiya. Kaduwe

[†] 6:5 Gug 16:23, 17:5, 2Kol 11:23-27

amauloulolo-dina wagaidiya kivetuvetunu anuwanuwagana, aku keke ida luvealikama.

¹⁰ Wa yama nuwavita amiyamiya aku Yaubada gikivemwamwalima. Amaita vaita fanifanimeyavo[†] nonogana Yeisu yana vewala aawatalatalainena, e ada kaliva moyaidi Yaubada yana nuwanuwa wagaine ivekaikaiwabu. Yama lokoloko moyaina keke, aku ime Yaubada natunavo faina, Banae yana giba moyaina ani ime yama gaitoma. E ada taidei anafaiweya ime Yaubada yana tofaisewa velemonoani aseseyegemonena.

¹¹ Tubuiyameyavo meKolinita, yama ifufu wagaine yama nuwanuwa moyaina aawamogatalena tunutunugina wagaimiya. Imeyavo ani anuwakabubuyemi lakai-vagina.

¹² Taidei vita-nai adamwatuguya ani ime anuwakabubuyemi, aku imiyavo ani aseasemi gikuga wagaimiya.

¹³ Aku malinai gaifufu wagaimiya vaita imi natukuweyavo. Imeyavo anuwakabubuyemi, ada nuwanuwama imiyavo kaduwe wayami nuwakabubu wana awaegemi wagaimiya anafaiweya.

Yaubada yana kalivayavo keke adilauboda ida vetutamwaidi badi keke tovetumagana nodi.

¹⁴ Kaliva manamanawena ada kaliva maufona ani adivemanawe keke ida veaigaigabu, e ada kai veinuwana ina ewana, aga ina vitamoenafaidiya. Ada kaduwe anafaiweya, kai seyana tovetumagana aku kaduwe seyana keke tovetumagana ani adiselu

[†] 6:10 Gug 3:6

ina vetutamwaidi, aga vita-moena faidiya. Keke ida veaigaigabu. E ada imi tovetumagana, ani keke gida luboda wana vetutamwaimi badi keke ida vetumagana nodi, faina keke yami nuwanuwa seyana wagaine wana miyamiya. Gavaiyamu, meyameyaganina dewa-nai yegayegana gina vetutamwaina veimeya anagadibudibusoyoga wagaine? Keke. Ada gavaiyamu, meyameyaganina malina gina vetutamwaina yuyuvana wagaine? Keke-bamowa.†

¹⁵ Ada gavaiyamu wanuwanuwa? Vaita Keliso ada Seitani yadi nuwanuwa seyana? Keke. Ada anafata banae gaito tovetumagana ada bana keke tovetumagana nodi ina vetubuiyana velemonoena? Keke.

¹⁶ Ada kaduwe, Yaubada yana manuwa tabu ada yaubada fwayafwaya ani gavaiyamu, tamo veseyana adimwatuguya? Keke. Yaubada yana manuwa ada yaubada fwayafwaya vuvudi, ani tulina tulina. Keke maita ida veseyana. Yaubada Tomiya-vagata yana ebamiya-nai wagaine gimiyamiya, ani ide tovetumagana. Yana manuwa tabu ani ideyavo.† Anafaiweya Yaubada yana Buki wagaine givona,

“Iya gana miyamiya yaku yoo wagaidiya
ke tova moyaina gana kwayakwayabudi.
Iya yadi Yaubada gana miyamiya
aku badiyavo yaku kalivayavo ina miyamiya.”

†

† 6:14 Efes 5:7-10 † 6:16 1Kol 3:16, Efes 2:22 † 6:16 Iyeg 6:7, Vei 26:12, Iyel 31:33, Isik 11:20, 37:27

17 Tainei faina “wana miyayegemona badi ide-wadewa koyona adimwatuguya, ada wana miyadaka wagaidiya.

Gavana bwanebwanenena matakuya ani keke maita nimami wanasei wagaine, e ayo gana vagaulemi wanamiya wagaikuya.**

18 Ada Iyayeku ani gana vetama imi wagaimiya, ada imiyavo ani natukuweyavo kaliva ada vevine.

Iya KAUYEYA Totoyogi-vagaiku gavona.” †

7

1 Tubuiya aseasekuweyavo, vonadabadababina taidei Yaubada giveda faina, gavadi vovoda o kai aluwaluwada ikivebwanenena, ani gilubodada kana kolaege-yabudi wagaideya ke wagaidiya kana miyavilada. Wa yada vemoimoina Yaubada kamatausena faina, adalauboda taudeyavo kana awaegeda Yaubada yana dewa tabutabuna wagaine ke kana gaveuveulena. E ada keke tamo koyona wagaideya ina miyamiya, aku yada dewa matatabu-moena yegayegana anafaiweya Bana yana nuwanuwa.†

Paulo yana vemwamwala Kolinita tovetumagana faidiya.

2 Nuwanuwama imiyavo wa yami nuwakabubu wana awaegemi wagaimeya. Keke tamo gaito

** 6:17 Vona-dina taidei tuwaina Yaubada givonayedi yana kalivayavo wagaidiya Aiseya wagaine, tova-nai gidouwedi iyege-mona yadi miya vewakawaka wagaine. (Ais 52:11, Isik 20:34,41)

† 6:18 2Sam 7:8,14, Ose 1:10 † 7:1 1Iyo 3:2-3

wagaina adadewa koyona, keke tamo gaito ada nuvuyoye wai tunutunugina wagaine-deya, keke tamo gaito ada lumodove-kavovo ke yana mani o kai tamo gavana gida velema, keke.

³ Keke vaita taidei anafaiweya gadavona e ada gada awavekoyoyemi, keke. Bademowa gavonemi vaita anuwakabubuyemi lakai-vagaina. E ada kai wayawaida nodi kana miyamiya o kai nodi kana alika, yama nuwakabubu wagaimiya keke ginaavai.

⁴ Ganuwavetumaganemi faina, yaku vona keke gadavona venuwana. Tova ke tova wa yaku vemwamwala amiyegana gakikilakaina kaliva wagainiya. Velemoena amagaluvaluva ke amauloulolo moyaina ikikivevitama, aku imiyavo ganuwanuwayemi e ada gikikiveasevatuku ke gavemwamwala-mowa.

⁵ Faina tova-nai ayegemona Masedoniya anafafaliya, aku gadedeku gadedeku anaunau, kaliva vita ikikiveyegemonina wagaimeya ayo yama veyawai anatova keke. Moyaidi nodi agavekwavekwageya, aku kaduwe matauta lakaina givaima ada anuwanuwa lakaina.

⁶ Aku Yaubada, Banae tonuwavita nuwadi gikiveiwakanedi,[†] ani nuwama gikivemwamwalina Taito giyewa aitana wagaina.

⁷ Yama vemwamwala vuvuna ani keke Taito yana yewa gaga faina, aku tova-nai anogalina imi wakiveasevatuna, kaduwe banae yama nuwanuwa gikivemwamwalina. Banae giawatalatalaina wagaimeya vaita

[†] 7:6 2Kol 1:3

imi nuwanuwami velemoena wana itaku, wanuwavita dewa-nai wagugaiyena faina ada watagiya faine, ada nuwanuwami yada vetubuiyana kanayogo-vagilena. E ada amivaleya-nai ganogalina wagaine, yaku vemwamwala gikivetubugi-moena.

⁸ Yami leta gaimilina ani kai gikivenuwaviti. Aku nuwainagekuya keke gadavona, “Kai gakoyona. Gavana faina gavetokilumi?” Keke anafaiweya gada nuwanuwa, faina leta-nai gavetokilumina ani amilema faina. Velemoena nagona faine ganuwavita, faina gaalamanena wanuwavita yaku vona-dina toyogidi wagaine, aku muliya gaitanuwigana vaita yami nuwavita-nai keke aimo wada naunauwe.

⁹ Aku malinai gavemwamwala, keke vaita gada kivenuwaviti faina, aku gavemwamwala faina taidei yami nuwavita-nai ginagoyemi e ada koyona anawai wasegena aku wanuwavilana ke Yaubada yana wai wamulimuliyena. Taidei yami nuwavita-nai walutovonina ani Yaubada nuwanuwana anafaiweya, e ada keke uloulolo wada nuwaga velemoena yaku vona gaetoladina wagaidiya.

¹⁰ Nuwavita Yaubada yana nuwanuwa analauboda, ani gina ivenuwanuwada velemoena ke gina nagoyeda ada yada dewa kana kiveiwakanedi. Taidei wagaine Yaubada anafaiweya gina kibababaleda.[†] Ada gaito gina nuwavita dewa-nai anafaiweya faina? Keke tamo gaito. Aku badi babi ananuwanuwa gagana imiyamiyanena, ani kai ina nuwavita yadi dewa

[†] 7:10 2Sam 12:13

koyona faina, aga au inuwanuwavita aku keke ida nuwanuwavila. E ada taide anafaiweya tova matatabuna, ginanau-deya, ina alika.

¹¹ Aku taumada, wanuwayewa yami dewa faina ada wanuwavita Yaubada yana nuwanuwa anafaiweya. E ada guwana iwakana waseyegemonena, ani kana nuwanuwayena. Wa yami dibumwaiga velemonoena yami nuwanuwa wasena Yaubada wagaine, ada nuwanuwami wana awavelemoenayemi vaita keke wada sidamane kaliva matadiya. Yami koyona wagaine vovomumu walutovonina faina, au wanuwakoyo bana faine, aku kaduwe wavenuwana lakaina vaita kai yami koyona gina naunau, aga Yaubada gina vematavulogimi. Kaduwe taidei yami nuwavita-nai faina, yami nuwakabubu wagaikuya giyegemona, ada nuwanuwami gana alamanena vaita bademowa vematavuloga wavelena kaliva-nai gikoyona, anafaiweya gavonemi. Taidei yami dewa-dina givewala vaita gaitoma matatabuna bademowa wakivetununa.

¹² Yami leta wagaikuya-deya, ani keke banae gikoyona faine[†] o kai banae koyona-nai ginuwagana, aku aiyada nuwanuwaku gana lememi e ada yami dewa wana ivemogatalidi Yaubada matane. Taidei wagaine nuwami gina malina vaita imi taumiyavo velemonoena waawaegemi wagaimeya.

¹³ Tainei faine yama nuwanuwa iveiwaka. Aku kaduwe, yama mwala gavatubuga tova-nai anogalina gavaiyamu moyaimi Taito nuwana

[†] 7:12 1Kol 5:1

wakiveiwakane, e ada wa yana vemwamwala gimiya miya.

¹⁴ Nagona Taito matane gadavami, ayo bana gielai wagaimiya ada giitana yami dewa iwakana, e ada keke gada vovomumu gadava faina. Au gavana matatabuna avonemi ani vona velemono, ada kadu anafaiweya, yaku vona awadavadava faimiya Taito wagaine ani vona velemono.

¹⁵ Moyaimi wa yami matauta ada wa yami ve-moimoina wavagaulena, ada kaduwe matawanai gavelena faimiya ani wavanenegenena ke wamatawalewaleyena. E ada malinai yami dewa ginuwaududuna wagaine, yana nuwakabubu wagaimiya giveiveinala.

¹⁶ Ada gaalamanena imiyavo velemono wa amivetumagana faina, gavemwamwala velemono.

8

Paulo tovetumagana givonavagadoned i ke vele kavovo anakwakwa i na luyabuna.

¹ Ada tubuiyameyavo, nuwanuwama wana alamanena gava i yamu Yaubada wa yana nuwadoga tafalolo seyana seyana gilemedi Masedoniya anafafali wagaine,[†]

² Faina vita moyaina i yegemona wagaidiya ke igaluvaluvadi toyogina, aku auwe badi ivemwamwala lakaina. Ada kaduwe badi tofanifani-mowa aku au vele kavovo wagaine ivelavelau lakaina, wa yadi vemwamwala lakaina, wa yadi awaega velemono wagaine.[†]

[†] 8:1 Lom 15:26 [†] 8:2 Mak 12:44

³ Iya gaalamanena vaita taidei velemonoena, faina Iya tauku gaitana keke mani idavele vaita etowava wagaine, aku mani lakai-moena ivelavelau. Taidei anafaiweya idewa ani ida taudiyavo yadi nuwanuwa wagaine.

⁴ Tova ke tova iveolema toyogina ana awaegedi ke Yaubada yana yoo mali fafali wagaidiya nodi ina velekaovo, e ada ina lemelemedi Yaubada yana kaliva badi ivefanifani.**

⁵ E ada ime anuwavetumagana vaita badiyavo yadi mani tufona inasena, aku keke mani gagana ida awaege aku nagona taudiyavo iawaenge matatabuyedi Kauveya Yeisu wagaine. Ada muliya kaduwe wagaimoya, Yaubada yana nuwanuwa anafaiweya.

⁶ E aku Taito bana gimaduvona asevatumi yami velavela anamani wana kwakwana faina, ime avonavagadonena avona, "Oye udana meKolinita tovetumagana uda lemedi yadi velavela ida luyabuna. Taidei anafaiweya badi kaduwe wa yadi nuwadoga yadi velekaovo ida imilina." Taidei anafaiweya avona Taito wagaine imi faimiya.

⁷ Imiyavo gaitoma moyaidi iwakadi wawaive-mavemavuga. Ebaita, yami vetumagana Yaubada wagaine wakidonena, yami ifufu Yeisu faina ani ebanuwayaudi, Yaubada yami nuwanuwa gikikivemalina yana ebaveimeya faina, wa yami dibumwaiga velemonoena yami nuwanuwa wasena Yaubada wagaine, ada kaduwe wunuwanuwakabubuyema

**

8:4 Badi ivefanifani ani imiyamiya Yudiya anafafali wagaine.

velemoena. E ada nuwanuwaku kaduwe taidei velekovovo-nai wagaine yami awaega wagaine wana waivemavemavuga.† Faina taidei seyana dewa wagaine Yaubada yana nuwadoga giseyegemonena.

⁸ Aku ida keke vaita Iya gada veimeyemi toyo-gina velekovovo faine, keke. MeMasedonia tovetumagana yadi awaega gaifufuyena wagaimiya e ada gana galuvaluvami. Imiyavo ani gavaiyamu, Yaubada ada kaliva wanuwakabubuyedi o keke?

⁹ Faina waalamanena yada Kauveya Yeisu Keliso yana dewa ani wa yana nuwadoga. Banae Tokaikaiwabu gabameya nonogana imi faimiya givefanifani,† e ada Banae yana vefanifani wagaine imi gina lememe ke wana vekaikaiwabu Yaubada yana nuwanuwa anawai wagaine.

¹⁰ Velekovovo anakwakwa faine yaku vona lema ani taidei anafaiweya. Malamala gi-avaina imi totafalolo-mina wamadunuwanuwa velekovovo faina, ada kaduwe velekovovo anamani wamadukwakwa.

¹¹ E ada malinai gilubodami gugai-nai wavevuvuna, ani wana luyabuna. Wa yami aseawaega wavevuvuna anafaiweya, kaduwe wa yami aseawaega wana luyabuna. Gavana wagaimiya anafaiweya ani wana velavelau.

¹² Faina kai bademowa wa yami aseawaega velekovovo wanasena, aga gavaiyamu amifaiweya wana velavelau ani Yaubada taidei gi-awaveiwakanena.† Keke gida nuwanuwa vaita

† 8:7 2Kol 9:8 † 8:9 Mad 8:20, 20:28, Fip 2:6-7 † 8:12 Mak 12:43

auwe kai yada mani kabisona aku lakaina kada velevelena.

¹³ Keke gada nuwanuwa vaita velelavovo lakaina wanasena e ada tofanifani lema ida vaina ada yadi miya gida meyameyaganina aku imi yami miya gidavita, keke. Aku aiyada yaku nunu ani moyaimi yami miya ina veaigaigabu.

¹⁴ Tova taidei yami lokoloko o kai mani lakaina wagaimiya aku kaliva tufodi ivemaufu, ada yami velelavovo wagaine-deya lema ina vaina e ada adifata. E ada gavatoveya imi wana vemaufu, badi kaduwe kai lakaina wagaidiya ina lememe wana vaina e ada imi amifata. Taidei wagaine moyaimi yami miya gina veaigaigabu.

¹⁵ Anafaiweya tova-nai Yaubada yana kali-vayavo meIsileli mana giveleveledi, ani ivetokilumina Veyavo Tuwaina anaBuki wagaine, givona, “Badi gavega mana moyai-vagaina ikwakwa ani aimo anatufo keke, aku badi gavega mana toiye gagana ikwakwana ani keke ida vemaufu.” **

Gaito ginana Taito nodi ke velelavovo inavai?

¹⁶ Aku Iya gavesiule Yaubada wagaine, faina ime wa yama idibumwaiga anuwanuwa toyogina imi faimiya, ani anafaiweya Yaubada Taito

**** 8:15** Una itana Iyegemona 16:4-18, tova-nai Yaubada wagabameya-deya mana giimilina ada anaetowava gisena kwakwa faina. Kaliva tufodi ikwakwa tubuiyadiyavo faidiya aku tufona ikwakwa taudiyavo gagana faidiya. Aku ikani muline, kaliva seyana seyana anafaiweya. Taide anafaiweya tuwaina giyegemona ani Paulo givonalufefosau meKolinita faidiya, vaita tova-nai tovetumagana Kolinita wagaine inalema badi ivefanifani Yelusalema aga seyana seyana wagaidiya keke ina vemaufu aku moyaidi adifaiweya.

kaduwe nuwanuwa-nai givelena ke ginuwanuwa faimiya.

¹⁷ Ime aveolena ke ginaela gina madubodami e ani giawaegau, aku velemoena banae tauna wa yana dibumwaiga giveimeya ginaelai wa-gaimiya.

¹⁸ Ada kaduwe tubuiyama seyana nodi aimiim-ilina, banae yana awaega valeya iwakana analau-mamala wagaine faina, tovetumagana adiyoo tulina tulina idavadavana.

¹⁹ Aku kaduwe, tovetumagana adiyoo moy-aidi ivenuwadadanena ke banae gina kwayabuma tova-nai velekaovo ana nauwena Yelusalema tovetumagana wagaidiya. Taidei ana faisewana ke Kauveya Yeisu anayegana ana kilakaina, ada kaduwe faisewa-nai wagaine ina alamanena vaita wa yama aseawaega nuwanuwama ana lemedi.

²⁰ Velekaovo lakaina wasena faina, nuwanuwama ana itaveyabi-dewedewena. Keke iwakana kai seyana gaito gina awalaveyema. **

²¹ Faina nuwanuwama ana dewadewa tunutunugina Kauveya Yeisu matane, ada keke Banae gagana wagaine aku kaduwe kaliva matadiya.

²² Ada kaduwe tubuiyama seyana badi adis-elu nodi aimiimilina, banae tova ke tova gait-oma moyaidi wagaidiya aitana ani wa yana aseawaega Kauveya Yeisu faine gifafaisewa.

** 8:20 Paulo ada tubuiyanavo nodi ani imatauta vaita seyana gaito gida nuwanuwa vaita velekaovo anamani tufona idavai badi taudiyavo faidiya e ada gidavona venuvenuwadadanedi. Taidei faina badi nuwanuwadi kaliva-nai ekalesiya ivenuwadadanena gina kwayabudi.

Ada banae givetumaganemi velemonoena vaita yami velelavovo wana velavelau faina, malinai wa yana aseawega velemonoena nuwanuwana gina lememe taidei faisewa-nai wagaine.

²³ Aku Taito ani gavenuwadadanena faina banae tubuiyaku nodi afaifaisewa amilema faina. Aku tubuiyameyavo adiselu ani badi ielaelai ekalesiya adiyeganeya, ada Yeisu Keliso yana iwakana mamalina iseseyegemonena.

²⁴ Taidei faina wana vaguesi mwaleya ada yami nuwakabubu wana seyegemonena wagaidiya, ada taidei wagaine ekalesiya wana lemedi ke ina alamanena gavana vuvuna imi faimiya agakaikai.

9

Yaubada nuwanuwana ide wa yada vemwamwala kana velelavovo.

¹⁻² Yaubada yana kalivayavo tovetumagana ivemaufu Yudiya wagaine, ani gaalamanena vaita bademowa wa yami idibumwaiga nuwanuwami wana lemedi, e ada keke tamo vuvu faikuya ke faine aimo gana vetokiluma wagaimiya. Velemonoena, nuwanuwami wanalema faina, gakaikaiyemi meMasedonia tovetumagana wagaidiya, gavanaga, "Tubuiyadeyavo tovetumagana imiyamiya Kolinita, ani bademowa malamala giavaina yadi nuwanuwa isedewedewena ke ina velelavovo." E ada yami idibumwaiga anavaleya inogalina wagaine, tovetumagana moyaidi fafali lakaina Masedoniya wagaine aseasedi ginuwaawaegau,

e ada badi kaduwe ikidewadewa velelavovo-nai faina.

³ Taidei anafaiweya faimiya gagakaikai aku tubuiyadeyavo aditoto gaimiimilidi, e ada badi yadi lema wagaine velelavovo anakidewadewa wana luyabuna. Keke nuwanuwaku yaku dava imi faimiya ani evona vaita gadavona-kavokavovo.

⁴ Wana itana, kai gava tovetumagana Masedoniya-deya Iya nodi anaelai wagaimiya ada ina itanuwagana vaita keke wada kidewedewe, aga ime ana vovomumu. Aku imi meKolinita ani wana vovomumu koyokoyo-mowa.

⁵ Taidei faina ganuwanuwa vaita gilubodana gina yegemona velemono, e ani tubuiyadeyavo gavanavagadonedi ina maduaelai wagaimiya ke ina lememi yami velavela wanamadu kidewadewa-yabuna, taine velelavovo-nai bademowa wavanadabadabayena. Nuwanuwaku yami velelavovo-nai ani wa yami nuwadoga wana aseawaegau ke wana velavelau. Keke iwakana kai keke yami nuwanuwa aku walutovonina vaita auwe anafaiweya wana faisewana.

⁶ E aku taidei ganavona. Gaito waifei anaetowava kabisona gifana, aa kabisona gina yalana. Aku gaito waifei anaetowava lakaina gifana, aa lakaina gina yalana.[†]

⁷ E ada giluboda-moena imi seyana seyana tauni nuwainageniya bademowa uvenuwadadana anafaiweya, ya velelavovo

[†] 9:6 Vona 11:24

unasena. Keke iwakana ya mani una nuwalolone e aku ina luyayalini faina una velelavovo. Faina badi gavega wa yadi vemwamwala ivelavelau ani Yaubada ginuwakabubuyedi.

⁸ Ada Yaubada anafata wa yana nuwadoga yana vetala gina velevelemi, e ada tova moyaina gaitoma moyaina wagaidiya amifaiweya. Ada velemoena lakai-moena wana nuwagana ayo gavana yami nuwanuwa, e ada amifata gugai moyaina iwakadi wana gugaiyedi kaliva faidiya.

⁹ Anafaiweya Same wagaine ivetokilumina, ivona,

“Wa yana nuwadoga velemoena givelevelekavovo tofanifani wagaidiya, e ani yana dewa yegayegana Yaubada gina nuwaududu-vagina.” †

¹⁰ E ada Yaubada Banae waifei giavetavetala tobakula faine ke wamo aa faina, ani kaduwe yami waifei gina velelemi ke gina kivetubugina,† e ada wa yami nuwadoga wana velavelau ke yami dewa yegayegana guwana Banae gina ivedawanina.†

¹¹ Gaitoma moyaina wagaidiya Yaubada gina avetavetalemi e ada amifata wa yami nuwadoga velemoena wana velavelau. E ada tova-nadi yami velavela anawai ana nauwena badi gavega ivemaufu wagaidiya, yami awaega ina itana ada inavona vesiule Yaubada wagaine.

¹² Velelavovo waimiimilina, ani gaitoma iluwe i wakadi ina yegemona wagaine. Seyana

† 9:9 Sam 112:9 † 9:10 Ais 55:10 † 9:10 Ose 10:12

ani gavana Yaubada yana kaliva tabutabudiyavo ivemaufu wagaine, ani walemelemedi. Ada kadu seyana ani yami gugai-nai iwakana wagaine vona vesiule moyai-moena kaliva wagaidiya ani ina lakalaka Yaubada wagaine.

¹³ Yami velekaovo-nai wagaine, ani wana awavelemoenayena moyaidi wagaidiya vaita imi tonogalayavo velemoena. E ada kaliva ina itana ke imi faimiya Yaubada anayegana ina kikilakaina, ina vonavona, “MeKolinita ivonavona vaita taudiyavo iawaegedi Keliso anavaleya iwakana wagaine, aku kaduwe badiyavo imatawalewaleyna. Wa yadi nuwadoga iavetavetala ide wagaideya, ada kaduwe moyaidi wagaidiya.”

¹⁴ Ada wa yadi vesiule ina nuwenuwena vaita Yaubada wa yana nuwaawaegena velemoena wagaine gilememi lakai-moena, ada taide faina taudiyavo ina aseawaegemoedi yadi veoveola wagaidiya imi faimiya.

¹⁵ Kana vesiule Yaubada wagaine adanuwak-abubu faine. Keke kanavona!

10

Kaliva tufodi Paulo iawalavena e ada banae yana faisewa giawababalina.

¹ Aku imi tubuiyakuweyavo, Iya Paulo tauku gana ifufu wagaimiya. Gaalamanena kaliva tufodi amimwatuguya ivonavona, “Tova-nai Paulo ide nodi, bana ginuwanuwaobu ada givonavona bikana. Aku kai gina segeda-ku ginanau, aga yana leta wagaidiya givonavona toyogina.” Aku Iya Keliso yana dewa ganuwanuwayena, Banae

yada ebaita. Banae tonuwaobu ada yana dewa bikana,[†] e ada yana dewa-nai anafaiweya ada Iya keke gana veiveimeyemi, aku gaveolemi yami dewa wana sedewedewedi.

² Aku gaalamanena tova-nai ganaelai wagaimiya, aga ganavona toyogina kaliva tufodi wagaidiya ineneku imi nodi. Badi kaliva-dina inuwanuwa sidamana vaita ime keke ada miyami Yaubada yana toyogina wagaine, aku adewadewa babi anaveuluwa wagaidiya. Yaku veola toyogina wagaimiya, ani keke bonadi wana nogali aenanai kaduwe ana itanuwagana vaita gilubodana ani kaduwe imi wagaimiya adavona toyogina.[†]

³ Velemoena ime kaliva-mowa nonogana keke babi taidei ananuwanuwa wagaine ada lulugaviya.

⁴ Faina ime yama lokoloko gaviya Yaubada givelema, ani keke kaliva-mowa yadi lokoloko gaviya. Aku aiyada yama lokoloko gaviya ani Yaubada yana toyogina gimiyamiya wagaidiya.[†] E ada amafaiweya wagaidiya fafali-dina Seitani giveiveimeya toyogina ani ana luyaweyawelidi.

⁵ Babi ananuwanuwa balana keke ida veaigaigabu Keliso anavaleya iwakana wagaine, ani aluyaweyawelidi. Ada nuwalaka seyana seyana ilakayegeyegemona ke kaliva ina sebodadi wai-nai wagaine Yaubada ina alamanena, ani aluyaweyawelidi. Ada kaduwe gaviya analokoloko taidei wagaidiya, nuwanuwa seyana seyana akiveyabidi ke Keliso ina matawalewaleyna.

[†] 10:1 Mad 11:29 [†] 10:2 1Kol 4:21 [†] 10:4 Efes 6:13-17

⁶ Ada abodaboda e ada nagona imi meKolinita taumiyavo wana awaegemi Keliso wagaine ke wana vemoimoinena. Ada aimo tova-nai yami matawalewale bademowa wana seyegemoneyabuna, aga gavega idibusoyoga ani bademowa akidewadewa ana vematavulogidi.

⁷ Wana itana. Gavana giyegeyegemona amimwatuguya, ani nuwami gida malina faine. Kai seyana gaito wagaimiya givetumagana vaita tauna Keliso yana kaliva, aga gilubodana gida nuwanuwa dewadewa, vaita banae Keliso yana kaliva anafaiweya, ime kaduwe ani Keliso yana kalivayavo.

⁸ Kai anaita vaita veimeya-nai Kauveya givlema faina gakaiya maita lakai-moena, aku givlema ke yami vetumagana ana kivetoyogina, keke ana kivekoyo. E ada Iya keke gada vovomumu yaku veimeya gana vegugaiyena faina.

⁹ Keke nuwanuwaku wana nuwanuwa evona vaita gada galuvaluva ke gana kivematausimi yaku leta wagaidiya.

¹⁰ Vona taidei gavonayena faina seyana gaito wagaimiya givona, "Paulo yana vona yana leta wagaidiya ani vitadi ada toyogidi e ada wana vemoimoinena. Aku tova-nai idedeku adamwatuguya ada giifuifufu wagaideya, ani kaliva iawavekoyoyena ada ivonaga, 'Gadedeku yana ifufu anatoyogina? Yana ifufu ani au vona kavokavovo.'"

¹¹ Gilubodana kaliva-nai givonavona anafaiweya, ani nuwana gina afolena vaita dewa toyogina aseyegemonena yama leta wagaidiya tova-nai ime atuwadeya, ani anafaiweya dewa-nai

ana seyegemonena tova-nai anaelai ke imi nodi kana miyamiya anatoveya.[†]

¹² Aku keke wana venuwana. Ime keke maita anavona vaita iwakameyavo anafaiweya taide tove-wala fwayafwaya ivonevonemi adiyegana lakaina. Aku wada iveitaveluveyedi taudiyavo gagana, ada taudiyavo adietowava anafaiweya ifaifaisewana yadi veitaveluveya wagaine. Badi yadi yavuyoga ani keke kanavona!

¹³ Aku amafafali-nai Yaubada gisena yama faisewa faina, ani bana wagaine ime afaifaisewa. Ada afaisewanau e ada yama gugai-dina guwadi faidiya ana gakaikai. Aku yama ehaveimeya-nai anaetonaba ani keke adavila wagaine e ada adagakaikai gaitoma wamelaleya faidiya, keke. Ada imi meKolinita, ani yama ehaveimeya-nai anaetonaba negenine wamiyamiya.

¹⁴ Velemoena, kai nagona ime keke adaela wagaimiya ada Yaubada yana vona ada lumamale, aga yama gakaikai imi faimiya anaita vaita adavila amafafali anaetonaba wagaine. Aku keke. Faina velemoena, ani imeyavo-mana amaduelai wagaimiya ada Keliso anavaleya iwakana alumamalenauwena.^{**}

¹⁵ Keke ehaveimeya-nai anaetonaba ana vagavagadamane ke ana gakaikai vaita mali kaliva ifaifaisewa yadi ehaveimeya wagaidiya ani taumeyavo agugaiyena, keke. Aku aiyada anuwaveyalaina vaita aimo yami vetumagana

[†] **10:11** 2Kol 13:2,10 **10:14** Maita 13 ke 14 adinuwanuwa lakaina ani taidei anafaiweya. Tova-nai Paulo yana veafositolo anaveimeya gigugaiyena ekalesiya Kolinita wagaine, ani keke gidavila yana ehaveimeya anaetonaba Yaubada givelena.

Yaubada wagaine gina toyoga, e au Yaubada yama ehaveimeya anaetowava gina kiveinalina,

¹⁶ e ada aimo amafata ana vagadamana mali fafaliya tainei yami fafali wadomone, ke valeya iwakana badi wagaidiya ana lumamalena. Mali fafali-dina wagaidiya Keliso anavaleya iwakana keke tamo gaito gida vewaledi, e ada keke ina ifufuyedadana inavona, “Taidei fafali-nai ani mali kaliva yana faisewa anaebaveimeya. E aku gavana faina Paulo wa tubuiyanavo nodi taudiyavo ikaikaiyedi kaliva-nai yana faisewa wagaine? Keke gida luboda.”

¹⁷ E ada anafaiweya vona seyana Veyavo Tuwaina anaBuki wagaine givona,

“Kai gavega nuwanuwadi ina gakaikai,
gilubodadi KAUVEYA gagana faine
ina gakaikai.” †

¹⁸ Faina badi gavega taudiyavo ikaikaiyedi ani keke adiwaveiwakana idavai. Aku badi gavega Yaubada gikaikaiyedi† ani biyavo-dina adiwaveiwakana ivaina.

11

Paulo gikivemala tovewala fwayafwaya faidiya.

¹ E, Iya wa yaku kwava tauku gana kaikaiyeku, aku wada atuvefaila wagaikuya. Velemoena, wana atuvefaileku.

² Faina Yaubada nuwanuwana lakaina imiyavo anakai-be-gagana yana yoo, ada

† 10:17 Iyel 9:24 † 10:18 Lom 2:29, 1Kol 4:5

Iya kaduwe anafaiweya ganuwanuwa faimiya. Nuwanuwaku Keliso anakaibe-gagana wana nuwakabubuyena. Gasetagomi Banae anakaibe-gagana faine, e ada imi vaita vavine matabolana anafaiweya ganasemi Banae matane, vaita yana vavine iwaka-vagaina, keke tamo koyona wagaine.†

³ Yami dewa ani yegayegana, ada velemoena taumiyavo waawaenge-yabumi Banae anakaibemowa wagaine. Aku Iya ganuwamatauta aenana kaliva tufodi yadi vefwayafwaya wagaine yami nuwanuwa ina kivekabekabebena, ada ina nuvuyoyemi anafaiweya mota tuwaina Ive gifwayanegenegena yana nuwauya wagaine.†

⁴ Bademowa ime aelai alumamala wagaimiya Yeisu faine, ada yana valeya iwakana aifufuyena ada wavetumaganena ke Aluwaluwa Tabuna wavaina. Aku muliya taide tovewala fwayafwaya ielai wagaimiya ilulumamala seyana Yeisu tulina faine, keke Banae Tau-moena ime alulumamala anafaiweya. Yadi valeya iseyegemonena vaita Yeisu anavaleya iwakana, ani au tuli-moena† nonogana wamadu vetumaganena ada mali aluwaluwa wavaina. Aku wada gavaiyamu, badi mali valeya iwakana ialiyena wagaimiya ada wa yami vemwamwala waatuvefailedi.

⁵ Badi tovewala-dina evo vaita badiyavo ani yami afositolo lakai-moedi, aku Iya wagaikuya ani keke tamo gavana wagaine ida veiwakasegeku. Keke tamo.

⁶ Kai yaku vewala ananogala ani keke

† 11:2 Efes 5:26-27, Ive 19:7-9 † 11:3 Eba 3:4,13 † 11:4 Gal 1:8-9

nuwawaivaina, aku Keliso anaalamana ani mamalina wagaikuya.[†] Ada anaalamana-nai, ani tova moyaina wai tulina tulina wagaidiya aseseyegemonena mamalina wagaimiya.

⁷ Tuwaina tova-nai Yaubada yana valeya iwakana wagaimiya galumamalena, keke gada veolemi vaita wana fatafataku, aku gafaisewa keke fata faina.** Taidei dewa-nai wagaine, Iya wa yaku nuwaobu gamiya vaita kaliva keke wa anayegana anafaiweya, aku taidei anafaiweya gadewa e ada imi gana kilakaimi. E ada taidei yaku dewa-nai wagaine ani gavaiyamu, kai taidei vaita gadadewa koyona matamiya?

⁸ Mali ekalesiya yadi mani wagaine ilemelemeku yaku miyami faina, e ada akufaiweya imi amimwatuguya gana faisewa. Aku gavaiyamu? Ina vaita badi wagaidiya-deya gada kiyafu? Keke.

⁹ Ada tova-nai Iya imi nodi kamiyaamiya aku tamo tova gavemaufu, ada keke seyana gaito wagaimiya-deya gada veole o kai gada kivenuwanuwami vaita gavemaufu. Faina tubuiyadeyavo Masedoniya-deya ielai, ada gavadi wagaidiya gavemaufu ani iavetavetaledi wagaikuya.[†] Taidei anafaiweya yaku dewa tuwaina-deya ada kaduwe tova aimoina ielaelai wagaidiya, tauku gaawaawataku e ada keke vita gana velevelemi aku itaveyabina faina.

¹⁰ Keliso yana nuwanuwa velemonoana ani nuwainagekuya, ada giitaitaku ada gavona taidei

[†] **11:6** Efes 3:3-4 ** **11:7** Paulo yana faisewa ani manuwa sinininila gifaifaisewadi, ada kabala-nai givaina yana faisewa-nai wagaine ani gilemena tauna yana miyami faine. [†] **11:9** Fip 4:15-18

anafaiweya. Gadedeku gadedeku ganaunau Akaiya anafafali wagaine, imi amimwatuguya Yaubada yana gugai gafaifaisewana aku keke gada awaegemi wana fataku. E ada keke tamo gaito yaku gakaikai faine gina awataku e ada gana ilova.

¹¹ Gavaiyamu, kai wanuwanuwa evona keke gada nuwakabubuyemi e ada Iya gada vonavona, “Mali tovetumagana ilemeku aku imi keke?” Keke-mowa. Yaubada gialamaneku ani ganuwakabubuyemi.

¹² Taidei yaku dewa-nai fataku keke faine ani aimo gana naunauwena. Taidei wai-nai wagaine, tayuwe tovewala-dina nuwanuwadi ina gakaikai vaita yadi faisewa amimwatuguya ada yaku faisewa adiita seyana, ani yadi gakaikai vuvuna gana dabana.

¹³ Faina waitana, tayuwe biyavo-dina ivon-avona toyogina evona badi afositoloyavo, aku velemoena badi afositolo fwayafwaya. Wa yadi vefwayafwaya ifaifaisewa, ada igaveuveula vaita badi Keliso yana afositolo velemoedi.

¹⁴ Aku keke meyami gidabovu, faina Seitani banae tauna anaita gina sevedavedamana ke gina veiveigavu vaita anelose seyana Yaubada yana malina gikikiveyegemonina.

¹⁵ Tainei faina, kai Seitani yana togugaiyavo kaduwe taudiyavo ina venuya vaita badiyavo wai yegayegana anatogugaiyavo, aga keke kada tataweyana. Aimo yadi gugai bwanene anafaiweya ani adilaufata ina vaina.

Paulo yana uloulolo-dina ginuwagadi Keliso

faine giifufuyedi.

¹⁶⁻¹⁸ Kaiya tauda faideya ani keke Kauveya Yeisu yana dewa anafaiweya, aku dewa kwavakwava kaliva iawaawaegedi wagaine, ina taudiyavo yadi nuwanuwa gagana wagaidiya. Aku tufodi ikaikaiyedi taudiyavo yadi nuwanuwa gagana wagaine faina, Iya kaduwe gana kaiyeku anafaiweya. Aku yaku kaiye-nai wagaine, ani Yeisu anayegana gana kilakaina. Keke tamo gaito ginavona Iya tokwava yaku kaiye faine, aku kai wanuwawanuwa vaita Iya gavekwavekwava, aga auwe, tokwavakwava wana atuvefailena anafaiweya, Iya wada atuvefaileku ke maita gana kaiyeku.

¹⁹ Wana itami, imi taumiyavo wanuwenuwemi vaita tonuwawanuwa velemoemi faina, wa yami vemwamwala tovekwavakwavayavo waatuvefailedi.

²⁰ Tovewala igakaikaiwabu ke veimeya moyaina wagaidiya ina veimeyedadanemi ke wana vetogugai wagaidiya, o kai yami giba ikaniyabuna, au waawaegedi ke waatuvefailedi. O kai badi yadi fwaya wagaine yami mani ina vaivai ina vegugaiyena taudiyavo faidiya, o kai iitaitatagomi. Aku auwe waatuvefailedi. Anafaiweya, kai magigimi ida tafina aga wadavona, "Iwakana!"

²¹ Badi kaliva-dina velemoena ikaiwabusegema! Faina badi yadi dewa wagaimiya, ani ime keke amafaiweya anadewa anafaiweya. E ada ime fanifani wa yama vovomumu badi faidiya. Aku tamo gavana faidiya ani gaito

wa yana asevatu giiwatavudi, Iya kaduwe wa yaku asevatu gana kaiyeku gaitoma-nai faina. E aku au ida dewa kwavakwava.

²² Gavaiyamu, badi tovewala-dina meIbeliu** ada bonadi Ibeliu? Iya kaduwe kwana Ibeliu. Ada gavaiyamu, badiyavo ani Yaubada yana yoo meIsileli? Iya kaduwe kwana Isileli. Ada gavaiyamu, badi Ebelaamo yana tubudelideli? Iyayeku kaduwe.†

²³ Ada badi gavaiyamu, Keliso yana togugaiyavo? Iya yaku vona adinogala ani anafaiweya kaliva kwavakwavana gida vonavona. Aku auwe ganavona, Iyayeku ani yana togugai-mowa. Iya wa yaku vediwe gagugai Keliso faine, ada tova tova deli wagaine kaliva iseseku faina Banae galulumamalena. Kaliva imunu koyokoyoku, ada tova ke tova kabisona gada alika yaku vewala faina.† Taidei gaitoma-dina moyaidi wagaidiya yaku awaega Keliso wagaine, ani lakai-moena ayo badi tovewala-dina yadi awaega.

²⁴ Keliso faine gagugai faina, tova faifi meIsileli aditonagonayavo ilubibiwaliku, ani tova seyana seyana yadi ilavuga teti naeni (39) anafaiweya.†

²⁵ Tova toiye meLoma imunuku fuluma wagaidiya, ada tova seyana yoo kabala wagaine ifiyafiyaku ina luvealikaku faina.† Tova toiye waka-dina wagaidiya gautuva, ani mala ke buli

** **11:22** Yegana-nai 'meIbeliu' ani badi meIsileli kadu adiyegana seyana. Taidei yegana iluwei ani badi kaliva-dina itubudelideli Ebelaamo ada natunavo Aisake ke Iyakobo wagaidiya-deya.

† **11:22** Fip 3:5 † **11:23** Lom 8:36, 1Kol 15:30-32, 2Kol 1:9,10, 4:11, 6:9 † **11:24** 2Vei 25:3 † **11:25** Gug 14:19, 16:22-23

iluyawelidi. Ada kaduwe tova seyana wakanai wagaine gautuva ani gikamomola, e ada awageya gialualugeku bogi matatabuna ada yadayada matatabuna muliya-yo inuwagaku.

²⁶ Tova ke tova ganumiyamiyanau, kabisona gilagi gada nuwagana gufa adidamana wagaidiya, tokiyafu wagaidiya, tauku yaku kalivayavo melsileli[†] ada badi keke melsileli wagaidiya,[†] ada melala lakaidi ke fafali kavovona ke awaga wagaidiya. Ada kaduwe, kaliva-dina ivona vaita badi Keliso anatovetumagana aku velemono keke, ani badi wagaidiya kabisona gada gilagi.

²⁷ Tova ke tova wa yaku vediwe gagugai toyo-gina, ada bogi gavaiyei keke gada dauda, e ada gagakabekabebe. Mafalavuga galutovonina, ada meyaku gikwakwa, ada tova ke tova gavemaufu aa wagaine ke kaleko, ada gayaguyagugula.

²⁸ Kaduwe keke taidei vita-dina gagana gada lulutovonidi, aku kadu maita vita-moena wagaikuya, ani vaita yadayada seyana seyana veinuwana gawaiwaina, tainei yaku nuwanuwa gimiyamiya ekalesiya fafali tulina tulina wagaidiya, kai yadi vetumagana Keliso wagaine ikikivetoyogina o kai keke.

²⁹ Kai tamo tonogala yana vetumagana wagaine gikabekabebena, aga yana kabekabebena Iya kaduwe galutovonina. Kai tovetumagana seyana tubuiyana gina vuyoyena ke gina koyona, aga akulutovona anafaiweya vaita aiyabeyabela aseaseku gida alaalai anafaiweya, faina ganuwakoyo. Taidei anafaiweya Iya yaku gu-

[†] 11:26 Gug 9:23, 13:50, 14:5, 17:5, 1Tes 2:15 [†] 11:26 Gug 14:5, 19:23, 27:42

gai anavita gawaiwaina Yaubada yana kaliva faidiya.

³⁰ Aku kai gilubodaku tauku gana kaiyeku, aga gaitoma-dina yaku kabekabebena iseseyege-moned, ani badi faidiya gana kaikaiyeku.

³¹⁻³³ Tuwaina melala-nai Damasiko** wagaine gamiyamiya anatoveya, melala anatoveimeya lakaina seyana gimiyamiya, banae Kini Alitasi yana veimeya dibune. Ada toveimeya-nai nuwanuwana gina kiabiku faina, kali lakaina melala-nai gibalawalilivugina, ani anawana wagaidiya yana tolugaviyayavo gisedi e ada kai ina itaku aga ina kiveyabiku. Aku kalinai wa anatutufolega, ada seyana wagaine tubuiyakuweyavo tufodi ituneveobuku kwalisi wagaine, e ada toveimeya lakaina gaosena.† Yaubada gialamanena keke gada vefwayafwaya. Banae yada Kauveya Yeisu Keliso Tamana ada kaduwe yana Yaubada, ani anayegana kana kilakai-vagina.

12

Paulo anavewala wagaine Yaubada givewalena Paladaisi.

¹ Kai taudeyavo adayegana kana gakaikaiyedi, aga keke maíta gina lemeda, keke. E aku keke tamo kadu gavawai faikuya. Tainei faina yaku

** **11:31-33** Damasiko ani melala lakaina gimiyamiya Loma anafafali seyana anavewaga Siliya. Ada melala-nai wa anakali lakaina gibalawalilivugina. † **11:31-33** Gug 9:23-25

ifufu maita gana nauwena, ada vewala-dina**
Kauveya Yeisu giseyegemonidi† ke gaitoma-dina
giivemogatalidi ani faidiya gana ifufu.**

² Kaliva seyana Keliso yana tonogala ani gaalamanena. Banae malamala fotini (14) giavaidi wagaine, Yaubada givai gilakavena gabamanai getane-mwane. Keke gada alamane kai kaliva wa vovona o kai aluwaluwanaga givai gilakavena. Yaubada anakaibe-mowa gialamanena.**

³ Ada gaalamanena kaliva-nai Yaubada givai gilakavena Paladaisi,** Banae yana fafali iwakavagaina ada vemwamwala-vagata melalina. E, kaduwe ganavona-vagilena, kai kaliva-moena wa vovona nodi o kai aluwaluwanaga givai gilakavena, ani keke gada alamane. Yaubada anakaibe gialamanena.

⁴ Ada fafali-nai wagaine gaitoma moyaidi ebakivenuwavogana ginogalidi, tayuwe gaitoma-dina wa adiwata Yaubada wagaine ke kaliva keke ina ifufuyedi.

⁵ Kaliva-nai ginau Paladaisi ada giyewa ani

** **12:1** Taidei maita-nai wagaine, vona-nai 'vewala' ani ananuwanuwa anafaiweya 'enoita', aku gaito gina nuwagana ani giitaita aku vewala giyegeyegemona wagaine. † **12:1**

Gal 1:12, 2:2, Efes 3:3 ** **12:1** Paulo givona bana yana kaiya gina naunau faina tovewala fwayafwaya taudiyavo ikaikaiyedi ada meKolinita tovetumagana tufodi ani ivetuvetumaganedi.

** **12:2** Anavelemoena ani Paulo tauna faine givonavona, aku wa yana nuwaobu giifufu vaita kai seyana gaito faine e ada kaliva keke ina nuwanuwa vaita banae wa yana nuwalaka tauna gikaikaiyena. ** **12:3** Paladaisi ani gabama anafafali iwakavagaina wadedeku anatomiyayavo ivemwamwala-vagata.

(Luk 23:43, Ive 2:7)

banae anayegana gana kilakaina. Aku kai tauku akuyegana gana kilakaina, aga au gaitoma-dina ikiveyegemonina vaita yaku toyogina keke lakaina ani taine gagana gana ifufuyedi.

⁶ Aku au kai nuwanuwaku tauku akuyegana gana kilakaina, aga yaku ifufu ananogala keke tokwavakwava anafaiweya. Faina gavaiyamu tauku faikuya gada ifufu ani au vona velemonoena. Aku auwe, keke tauku gana kaiyeku aenanai tamo gaito gina kilakai-kavovoku. Aku analauboda kaliva yaku dewa ina itana ada yaku ifufu ina nogalina, e ada taidei wagaine ina alamane-dewedeweku.**

⁷ E ada aenanai gana nuwalaka-mowa gaitoma moyaidi Yaubada giivemogatalidi wagaikuya faina, Yaubada ani Seitani** giawaegena ke yana tomatawa gina imili ebakiveuloulolo gina veleku. Taidei uloulolo-nai ani gionaonaku anafaiweya sikakakama,† ada taidei vita-nai wagaine keke gana nuwanuwalaka.

⁸ Tova toiye Iya Kauveya Yeisu gaawauyuvena ke ebauloulolo-nai gina miyasegeku.

⁹ Aku gilufata, givona, “Wa yaku nuwadoga galemelemen, e ada au anafata fainiya.† Faina badi gavega keke wa yadi toyogina, ani ida yaku toyogina analauboda-mowa.” † Taidei faina, wa yaku vemwamwala yaku kabekabebena

** 12:6 Paulo maita taidei wagaine givonavetutamwata tove-wala fwayafwaya ivekwavakwava, faina wa yadi fwaya nodi taudiyavo ikaiyedi. ** 12:7 Yegana-nai ‘Seitani’ ani vona Ibeliu. Banae aluwaluwa bwanenena aditonagona lakaina kadu Yaubada nibaina. † 12:7 Naba 33:55, Isik 28:24 † 12:9 Ais 43:2

† 12:9 Ais 40:29-31, Fip 4:12-13

gana kaiyena, e ada Keliso yana toyogina gina miyamiya wagaikuya.

¹⁰ Tainei faina gavatoveya Keliso faine galutovonina vaita gagakabekabebe, o kai kaliva iawadamaneku, o miya vitana gaatuvefailena, o badi Keliso idibusoyogena ikiveulouloloniku, gavavita gauloloyena ani au gavemwamwala. Faina tova-nai galutovonina vaita gagakabekabebe ada keke akufata, e au Keliso gina kivetoyogiku wagaine, Iya wa toyogiku.

Paulo ginuwanuwa toyogina Kolinita tovetu-maganayavo faidiya.

¹¹ Tauku akuyegana gakilakaina wagaine e ani vaita gada vekwavakwava, aku taine tovewala-dina wakaikaiyedi wagaine, waluimiliku ke gadewa anafaiweya. Iya akulauboda bademowa wada awaawaveiwakaneku kaliva wagaidiya, aku keke wada gugaiye. Iya anafaiweya kaliva-kavokavovo nonogana badi tovewala-dina evona vaita afositoloyavo lakaidiyavo velemonoena, ani keke gavawai wagaine ida kaiwabusegeku.

¹² Tova ke tova wa yaku atuvefaila lakaina afositolo velemonoena anaiyaiyaya gaseyegemonedi amimwatuguya. Yaubada yana toyogina wagaine iyaiyaya lakaidi ke gugai ebameyasidobodobo nuwami givaivaina gagugaiyedi matamiya, gaitoma-dina kaliva keke adifata ina faisewadi.

¹³ Gavaiyamu ada wanuwanuwa vaita mali ekalesiya gadewedi iwaka-moedi ayo imiyavo? Yaku dewa wagaimiya ada badi wagaidiya ani

seyana, aku gaitoma seya-moena, ani mali ekale-siya gaawaegedi ina lemeku yaku miya faina,[†] aku imi gaawatami e ada akuitaveyabina faina keke vita ganasei wagaimiya. Taidei yaku koyona-nai wada venuwaegena!

¹⁴ E aku malinai yaku ela anaveto wagaimiya faina bademowa gakidewadewa, aku aimo keke vita gana velemini akuitaveyabina faina. Gavagiba wagaimiya ani Iya keke nuwanuwaku, aku gaitoma-nai Iya nuwanuwaku velemono, ani imi taumiyavo.[†] Faina imiyavo vaita natukuweyavo, ada waalamanena biyabiyama keke ida bakubakula inadiyavo tamadiyavo faidiya yadi miya iwakana faina, aku velemono ani ina ada tama ibakubakula natudiyavo faidiya ke ina vekavekanidi.

¹⁵ E ada kai wa yaku aseawaega velemono Iya tauku gana awaegeku kadu gavana Iya wa-gaikuya gana awaegegi e ada gina lememi, aga au wa yaku vemwamwala gana gugaiyena.[†] Iya yaku nuwakabubu imi faimiya ani lakaina, e aku gavaiyamu yami nuwakabubu faikuya? Anaita kai givevekabiso?

¹⁶ Aku auwe, keke vita gada velemini akuitaveyabina faina. Aku gaalamanena tufomi taidei anafaiweya wavonavona, “Kaliva-nai Paulo ani banae ikavuya anakaliva. Giela giveonada yana fwaya wagaine aku yada mani tufona givaina.”

¹⁷ Aku gavaiyamu? Kaliva-dina gaimilidi wa-gaimiya, ani kai seyana wagaidiya gaveolena

[†] 12:13 2Kol 11:9 [†] 12:14 1Kol 10:33 [†] 12:15 2Kol 1:6, Fip 2:17, Kol 1:24, 1Tes 2:8, 2Tim 2:10

yami mani gina vaina Iya faikuya? Keke!

¹⁸ Ebaita Taito. Iya gavonavagadonena ginaela gina madubodami, ada tubuiyada† kaduwe nodi gaimilidi. E ada gavaiyamu? Kai Taito yana vonavefwayafwaya wagaine yami mani givaina? Keke. Banae keke wagaimiya gida vonavefwayafwaya ke yami mani gidavai. Ada Iya Taito nodi, ime yama nuwanuwa ke yama dewa ani seyana. E ada wada alamanena Iya kadu anafaiweya keke yami mani ganavai.

¹⁹ Kai yaku leta taidei waveyaveyawana aku wanuwanuwa ke wavonavonaga, “Paulo wa tubuiyanavo nodi ani taidei anafaiweya iifuifufu ke taudiyavo ina awabababalidi matameya.” Keke. Aku aiyada Yaubada matane† avonavona, imeyavo ani au Keliso nodi avesezana. O imi tubuiya aseasemeyavo, yama vevilaga moyaina ani imi yami vetumagana anakivetoyogina faina.

²⁰ Faina ganuwamatauta vaita tova-nai ganaelai wagaimiya, ani yami dewa tufodi gana itanuwigadi keke yaku nuwanuwa anafaiweya ayo gina lubodaku gada kivetunumi, e ada gavaiyamu ganavona wagaimiya ani keke nuwanuwami. Ganuwamatauta kai wana gavekwavekwageya, o wana veuveumagigi, o wana madumadu nuwakoyo taumiyavo wagaimiya, o taumiyavo gaga faimiya wana nuwanuwa aku keke mali kaliva, o kai kaliva wana veveloidi e ada adiyegana wana kikivekoyodi, o wana veyaveyaina, o wana nuwanuwa vaita amiyegana lakaina aku

† 12:18 2Kol 8:18 † 12:19 Lom 1:9, 9:1

anavelemoena ani keke, ada moyaimi koyona waatuatudadana.

²¹ Kaduwe ganuwamatauta vaita tova-nai ganaelai wagaimiya ada imi nagona wakoyokoyona, ani yami dewa aimo keke wada kivetunudi, e ada Yaubada gina kivevovomumuku matamiya yami dewa-dina faidiya. Iya gavonavona imi faimiya gavega vovo ananuwanuwa bwanebwane-nena tulina tulina tova moyaina wagugaiyedi, tova moyaina yami dewa-nai vuvuna ani nuwanuwa bwanebwane-nena. Kai aimo keke wada nuwavila ke koyona anawai wadasege, ada keke wada miyavilami Yaubada yana wai wada muliye, aga gana nuwavita lakai-moena faimiya.

13

Paulo giluwageyedi yadi dewa ina vuvugidi ke ina itavenuwadadanedi.

¹ Taidei yaku ela wagaimiya ani tova anaveto. Vona seyana Veyavo Tuwaina anaBuki wagaine gimiyamiya ani givona, “Gava gugai koyona faine kaliva seyana tamo gaito gina awavekoyoyena, gilubodana toitavedama adiselu o aditoto ina awatalatalaina seya-moena gavana giyegemona faina. Taidei wagaine gavana velemoena ani ina kivealamanidi, e ada kaliva ina alamanena ida vona velemoena.” †

² Tuwaina tova-nai yaku maduboda anavelu wagaine, imi gavega nagona wakoyokoyona, ani gavonamatawemi. Ada malinai atuwadeya

† 13:1 2Vei 17:6, 19:15, Mad 18:16, 1Tim 5:19

gamiyamiya aku vonamatawa kaduwe ganayona-vagilena wagaimiya. Ida tova-nai ganayewa-vagila ada ganaelai wagaimiya, ani kai gana itana kaliva-dina nagona ikoyokoyona aku aimo keke yadi dewa ida kivetunudi, auwe keke aimo wa yaku nuwakalikali gana atuvefailemi. Ada keke badiyavo gagana. Kaliva tufodi wagaimiya malinau koyona igugugaiyena ani kaduwe anafaiweya, gana kivetuvetunudi.

³ Keliso awakuya-deya giifufufu ani nuwanuwami amifata wana awavelemoena. E ada yaku dewa wagaimiya gina awavelemoena. Keliso ani keke vaita kaliva kabekabebena, e ada yami dewa koyodi-dina wana kwagekwageyena aku Bana au gina itaita-moe ke amikivetuvetunu gina dibusoyoga, keke-mowa. Au yana toyogina amimwatuguya gina seyegemonena.

⁴ Vona velemonoena, Keliso wa yana kabekabebena ikivebolagalagana,** aku au Yaubada yana toyogina wagaine gimiyamiya. Ada ime kadu anafaiweya. Ime gavega Banae nodi aveseyana, ani kabekabebena alutovonina anafaiweya Banae vovona wagaine, aku Banae nodi wayawaima amiyamiya Yaubada yana toyogina wagaine. Ada taidei yana toyogina-nai wagaine, gavana analauboda ada gugai amimwatuguya ani ana gugaiyena.

⁵ Aku imiyavo ani taumiyavo aseasemi wana vuvugi-dewedewena, e ada wana alamanena kai velemonoena taumiyavo waawaegemi Keliso

** **13:4** Keliso ani velemonoena Totoyogina, aku tova-nai ikivebolagalagana ani yana toyogina keke gida vegugaiye. (Fip 2:7-8)

wagaine ke wa yami vetumagana wamiyamiya. Taumiyavo wana galuvaluvami. Amifata Yeisu Keliso gimiyamiya nuwainagemiya ani wana inanana o kai keke? O gavaiyamu, kai amigaluvaluva gina vewalemi vaita yami vetumagana keke gida midimididi velemoena Keliso wagaine?

⁶ E ada ganuwaveyalaina wana alamanena ime keke ada kabebe amagaluvaluva wagaidiya, ada imi wana inanama vaita imeyavo ani Keliso yana afositolo velemoena.**

⁷ Aku aveola Yaubada wagaine ke gina lememe e ada keke tamo dewa koyona wana gugaiye. Faina nuwanuwama imi wanadewa iwakana. Ada kai kaliva ina venuwadadanema afositoloy-avo velemoena o kai keke, taidei gaitomakavokavovo anafaiweya. Aku kai yami koyona wana kivetunudi, aga imeyavo ana vemwamwala.

⁸ Kai imi bademowa Yaubada yana vona velemoena wamulimuliyena, keke gida lubodama ke gavana anagai ayo ana kivetunumi. Velemoena, keke amalauboda Yaubada yana nuwa velemoena ana venibaine, aku au ana faifaisewa faine.†

⁹ Kai Yaubada yana wai velemoena wa yami vetumagana toyogina wamulimuliyena, taidei ebavemwamwala, faina ime keke wa yama vuvu ada yama veimeya ana vefaisewa ke ana kivetunumi. Aku kai keke ana kivetuvetunumi,

** **13:6** Kai meKolinita nuwadi gina amutuna Keliso gimiyamiya wagaidiya, aga tainei gina awavelemoena vaita Paulo ani afositolo velemoena, faina banae-menai gilemedi ke Keliso ivetumaganena. (1Kol 4:15) † **13:8** 1Kol 13:6

aga amatoawavekoyo matadiya kai amaita vaita afositolo anaveimeya ani keke wagaimeya aku au kabekabebemeyavo. Aku kai badi inuwanuwa anafaiweya, au ina keke tamo gavana wagaimeya. Au Yaubada aveoveolena vaita gina lememi ke yami dewa moyaina wanagai ina veiwaka, e ada matatabumi kumagimiyavo yana nuwanuwa anafaiweya.

¹⁰ Iya Kauveya Yeisu yana afositolo, ada akuveimeya givaleku ke yami vetumagana gana kivetoyogina, keke gana kivekoyo. Keke iwakana ganaelai wagaimiya ada gana nuwagami aimo dewa-dina koyodi wamiyamiyanedi, e ada vona toyogidi gana vonayedi wagaine yaku veimeya anavegugai gana seyegemone.[†] Tainei faina Iya aimo atuwadeya gamiyamiya aku taidei gaitoma-dina faidiya gavetokiluma.

Lauwage tulina tulina ke vetalakafoi.

¹¹ Tubuiyakuweyavo, leta anatubuga taidei. Ada gavonemi, wana vemwamwala! Wana asekumaga Yaubada yana nuwanuwa anafaiweya. Yaku vona wana nogalina e ada wana asevatu. Taumiyavo veseyana wagaine wanamiya, ada kukuyeya wanamiya. Kai taidei anafaiweya wana dewadewa, aga Yaubada gina kwayabumi, Banae gikivemeyameyaganida ke kana venuwanuwakabubu seyana seyana ada kukuyeya kana miyamiya.

¹² Imi seyana seyana nodi wana venuwaga wagaine, wa yami nuwakabubu tubuiyamiyavo wana vesiuleyedi.

[†] 13:10 2Kol 2:3, Tai 1:13

¹³ Yaubada yana kaliva tabutabudiyavo moy-
aidi idedeku yadi vona vesiule wagaimiya.

¹⁴ Kauveya Yeisu Keliso wa yana nuwadoga
gina lemelememi, ada Yaubada yana nuwak-
abubu ke Aluwaluwa Tabuna yana vetubuiyana
tova moyaina wana lutovonina, imi moyaimi.

Iyayeku Paulo

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2